

霞

外

攬

屑

霞外攬屑卷八目錄

香雪庵半書丙集

山陰 平步青 景孫 纂

眠雲舸釀說上 詩話

子陵本姓莊

孔明不樂出身非諸葛武侯

康樂直用太冲語

璵璠

稟姚

重韻

五七律首句通韻

歇

到字詩卽翻韻詩

趙高

唐人詠馬鬼事皆大不敬

李正封

走馬川體卽促句換韻

郢斤

夫丁婦王

七古七字仄句

別離

甲辛庚辛

不嫁惜娉婷

愛閒

蘇詩

楊世昌

柴惟吉

五日生

戴敏絕句

元遺山句

高房山詩

青邱詩

入情愈工愈成宋調

陳黃

陳忠裕詩本文山

詩用事不露痕迹

注詩難

柳亭詩話

詠史詩

眠雲舸釀說下

詩話

申定舫樂府

周櫟園秦淮詩

潛邱詩

宋荔裳廉使女

張文和公風鳶詩

贊鹿峰詩箋

屈梅翁

陳慕陵詩

余寶岡司寇詩

穀城詩

陳句山太僕寓園詩

朱文正公詩

重赴鹿鳴

李兩邨詩

汪容甫

王仲瞿穀城西楚霸王墓詩

王仲瞿落花詩

王文恪公

綠雪堂集

綠雪堂詩誤

林阜閒集

瘦吟廬詩

持雅堂詩集

享帚集

宗滌樓觀察詩

志隱齋詩

滬寄生五古

柯亭子詩

孔有函太僕詩

廣綬堂詩

陸眉生給諫

巢雲詩稿

畢剛毅

趙耦邨詩

沈芸閣方伯集唐

盲詞入詩

蜚爐卽臭蟲

仇竹屏

紅樓夢戲詠

雙外壩屑卷八上

香雪庵萃書丙集

山陰 平步青 景孫 纂

眠雲舸釀說上 詩話

子陵本姓莊

潘素心夫人幼時過嚴州一絕云誰改州名姓字香釣臺千載  
屬嚴光豈知隱士終埋姓當日先生本姓莊楊葭漁先生 際昌  
奇賞之以爲前人所未道 庸按宋詩紀事俞成題釣臺詩千古  
英風想子陵釣臺緣此幾人登誰知避諱更嚴氏灘與州名總  
誤稱螢窗雜說嚴子陵本姓莊避顯宗諱遂稱嚴氏若釣臺若  
七里亦皆以嚴命名無非循習之譌而莫知其非也本朝宣和  
間方臘寇江浙改睦州爲嚴州蓋本於此至於范曄採東漢之  
史筆初不究其姓氏之由遽曰嚴光而傳之毋乃以田千秋爲

車千秋平潘詩全本於俞成字元德東陽人所著螢雪雜說慶  
元庚申自爲序蓋光宗時人也此詩卽載雜說卷下全浙詩話分  
爲二段者非雪作窗樊榭亦微誤容齋隨筆卷六子陵乃莊氏東  
漢避顯宗諱以莊爲嚴故史家追書之以爲嚴光後世當從實  
可也俞說蓋本景廬近時林茶安昌彝衣謫山房詩集卷四過七  
里灘釣臺云不釣王侯釣鯉魴東京風俗挽頽唐釣臺高並凌  
雲時記得先生舊姓莊則亦本俞詩非襲不櫛吟也

孔明不樂出身非諸葛忠武

湖海詩傳

卷四

史赤厓

善長

諸葛武侯草廬二十韻最雅健中

云少曰容堅臥衰朝肯致身吟淥以爲用抱朴子按升菴全集

卷四

抱朴子曰魏武帝嚴刑峻法果於殺戮乃欲用乎諸葛孔

明孔明白樂不樂出身武帝謝遣之曰義不使高世之士辱於

汚君之朝也升菴謂操不屈孔明有人君之度祁駿佳遜翁隨

筆下云正史不載抱朴子不知從何得之可與不留關公同爲

義舉二句亦本升菴然則魏武之度豈常人可及哉王侃江州筆乘謂

張澍集孔明事實而竟遺此豈抱朴子逸民篇亦未見乎曲園

雜纂卷二讀抱朴子則云此孔明非諸葛武侯也乃胡昭之字

十七史商榷卷六十四梁書隱逸傳敘首云含貞養素須文以

藝不爾則與樵者在山何殊異也何氏琦曰胡孔明有言隱

者在山則異見文選注引戚榮緒晉書管甯傳附載潁川人隨園

卷二十六已云三國有兩孔明一太祖爲司空丞相頻加禮辟

昭往應命旣至自陳一介野生無軍國之用歸誠求去太祖曰

人各有志出處異趣勉卒雅尙義不相屈稚川所云卽其人也

譏惑篇明云如中州有鍾元常胡孔明張芝索靖各一邦之妙

藝介侯不以之入事實最爲有識楊祁王皆誤也赤崖詩亦未



必用抱朴太平廣記卷二百引書斷胡昭字孔明潁川人與繇並師劉德升胡肥鍾瘦羊欣云昭得張芝骨升菴全集卷六十三引董北苑云劉景升爲書家祖師鍾繇胡昭皆受其學然昭肥繇瘦各得其一體景升卽劉表也按景應作德非謂其翰札之工更誤

康樂直用太沖語

左思詠史詩吾希段干木偃息藩魏君吾慕魯仲連談笑卻秦軍當世貴不羈遭難能解紛功成不受賞高節卓不羣臨組不肯緤對珪甯肯分連璽曜前庭比之猶浮雲而謝靈運述祖德詩云段生蕃魏國展季救前人弦高犒晉師仲連卻秦軍臨組乍不緤對珪甯肯分前四句鎔左句四爲二猶未礙臨組二句全用之不同者僅一乍字何耶

璵璠

歸田瑣記

卷一

左傳定五年璵璠注云美玉疏云一玉名疏必云

此者以三字皆玉旁恐讀者誤爲二玉旣是一玉則二字不宜

到四說文璠下璠璠魯之寶玉孔子曰美哉璠璠云云璠下但

云璠璠也客有以詩贈行者云比德古璠璠余告以押韻宜酌

改客引杜詩高價越璠璠

杜本作璠璠客誤引

蘇詩清廟陳璠璠爲解余

曰魏志鍾繇魯之璠璠潘尼贈陸機詩寸晷惟寶豈無璠璠皆

尙不誤唐以後始有作璠璠者

庸

按太白贈別從甥高五詩起

云魚目高泰山不如一璠璠賢甥卽明月聲價動天門亦尙不

誤一字蓋亦以爲一玉名非必用孔氏正義也太平御覽引逸

論語間玉篇璠璠魯之寶也孔子曰美者璠璠遠而望之煥若

也誤到璠璠爲璠璠誤玉爲也誤哉爲者誤矣爲煥遂相沿至

今并不攷左氏原文矣范石湖

涅磨無改是璠璠頻羅庵送

西之官直隸云何妨磨涅是璠璠本之白華絳跼詩王題

蘇祠落成圖恍若世寶陳璠璵

票姚

漢書霍去病傳爲票姚校尉史記作剽姚漢紀作票鵠康熙字典云唐人詩用票姚率作平聲且改票作嫖尤屬舛謬正字通因李杜詩改入平聲非近陳補勤詩存

卷十

蔣竹雲從戎秦隴

就婚汴梁贈行云聽說封侯渾不悔阿兄原是霍嫖姚自注票姚之票本去聲唐人作嫖從平音按霍官嫖騎尉不如竟作嫖爲妥庸按漢書武帝紀嫖騎將軍霍去病出隴西本傳仍作票騎則嫖上聲非平音陳說不知何本鄙意不如仍從服作票讀平聲或從李杜作嫖爲妥杜牧贈國手王逢詩鏖兵不愧霍嫖姚

重韻

日錄有古人小詩不避重韻長排大篇且有二三見者然亦有非重韻槩本以形近音近而譌者昨集玉雨淙茗罍以香山寄獻北都留守裴令公五言四十韻前云紫微留北闕綠野寄東皋後云公雖慕張范帝未舍伊皋何四十韻中而重押若是浣霞曰非也皋陶字本作咎繇四豪韻中本有咎字與有韻无咎之咎異香山原本必作咎不作皋傳寫偶誤遂種複耳柳州游南亭夜還敘志七十韻云前軒面江皋又云謨明富伊咎可證柳州敘志七十韻重二豫字重二曹字重二蒿字茗罍曰又燕字誤作平聲又切字韻畢數之止六十九韻卿講攷據頗有肌斷冤罔古人者若此類則觀書如月古人亦深感之第恨不多不能彙作一書但付之口談無人記之日久遺忘爲可惜耳香山渭邨退居押二房字夢游春押二行字寄元微之押二夷字出守杭州路次藍谿押二水字游悟眞寺押

二槩字學林亦舉之而無此條或宋時白詩猶未譌耶歐北詩

話卷十詩有一首中用重韻者任彥昇哭范僕射一詩三押情

字沈雲卿天長地闊一詩三押河字蓋本藝圃擷餘庸謂古詩

可不拘學林新編庸老杜上後園山腳曰尋收云云

五七律首句通韻

章大來後甲集卷上律詩首句失韻爲失羣孤雁落句失韻爲出

羣孤雁今人祇解首句耳阮亭先生姑蘇懷古詩末句胥字正

此例庸按養新錄卷六五七言近詩第一句借用旁韻謂之借

韻唐詩犬吠水聲中桃花帶雨濃錦幃初卷衛夫人繡被猶堆

越鄂君始敢其端至皮陸松陵集則不勝舉矣宋人借韻尤多

近代名家以此爲戒此後生之勝於前賢者退菴隨筆卷二唐

律第一句多用通韻字蓋此句原不在四韻之數謂之孤雁入

羣然不可通者亦不用也耐冷譚卷四五七律首句通韻詩家謂

之獨鶴出羣格唐宋皆有之如李義山錦帷初卷衛夫人繡被

猶堆越鄂君朱文公去歲瀟湘重九時滿城風雨客思歸之類

僕集中行腳僧云野鶴與孤雲天邊伴此身蓋用此格也又卷十

阮亭姑蘇懷古三首可與馬嵬簪筆爭長惜末首結句胥字

誤入七虞應作魚韻蓋偶然失檢然二語甚佳竟不能改惠氏訓纂

卷五上及金注辨譌則云胥有三音文簡讀胥爲蘇入十一模而

唐韻失收無論平水韻矣據惠說則己不知落句失韻無怪

惜文簡爲誤押也葛壯節雨田四十自傷詩馬不嘶風劍不

鳴等閒已老健兒身近來不敢窺明鏡恐照頭顱白髮新眞韻

出庚韻鳴字亦此例近出輶軒續錄卷三緝雅堂詩話或病其

眞庚通叶不無可議謂公詩皆稟兩間浩氣流溢楮墨固不必

拘拘於律切也蓋亦不知爲失羣孤雁矣

### 歇

升菴全集

卷五 東坡集卷七十二 蝶戀花九離別

春事闌珊芳草歇或疑歇

字似趁韻非也唐劉琮詩瑤草歇芳心耿耿傳奇女郎王真詩  
燕折鶯離芳草歇皆有出處一字不苟如此朱亦棟羣書札記  
十卷按謝靈運遊赤石進帆海詩首夏猶清和芳草亦未歇東坡  
用此升菴似失攷也 四庫全書總目總集詩文評類存目東  
坡詩話提要云引唐劉琮及傳奇女郎云而不知爲謝語則升  
菴本之陳袁氏按琮詩僻冷本非傳作至於徵及傳奇抑又末  
矣謝詩本之九章悲迴風芳以歇而不比屈子歇字則本左氏  
宣十二年傳憂未歇也又襄二十九年傳難未歇也杜皆注云  
歇盡也又禍未歇也杜無注蓋承上洪北江左傳詰引爾雅歇

竭也楊朱說皆非

到字詩卽翻韻詩

雲谿友議

卷十

黎瓘作翻韻詩慣向谿邊折柳楊因循行客到

州漳無端忤觸王衙押不得今朝看飲鄉堅瓠戊集

卷四

到字詩

翁仲如何作仲翁讀書全未有夫工想來難入林翰院只好州

蘇作判通則本之余永麟北窗瑣語

見覲雲甲編

今人但知出笑林

而已不知到字何論翻韻

趙高

復堂日記

卷四庚辰

清泉歐陽軒赤城月到山房詩有趙高一絕云

當年舉世欲誅秦那計爲名與殺身先去扶蘇後胡亥趙高功

冠漢諸臣意已恢詭後又云閱古逸史載趙高爲趙之公子抱

忠義之性自宮隱秦宮中爲趙報讎張良大索時卽避高家故



得免難詩云大賈滅秦憑女子奇謀興漢詎蕭曹留侯椎鐵荆

卿匕不及秦宮一趙高書此以廣異聞所稱古逸史不知何書

庸按陔餘叢攷卷四十一趙高志在報讎條趙高之竊權覆國備載

李斯傳中天下後世固無不知其奸惡矣然史記索隱謂高本

趙諸公子痛其國爲秦所滅誓欲報讎乃自宮以進卒至殺秦

子孫而亡其天下則高直以句踐事吳之心爲張良報韓之舉

此又世論所未及者也胡樓筆談卷三張蒙恬傳趙高昆弟數

索隱謂高本趙公子自金史宦者梁琬本宋奄人也勸海陵伐

宋人謂其與宋通謀使海陵疲敝國中云据甌北此條則古逸

史本之索隱語稍潤色而今本史記索隱無之 四庫提要於

索隱三十卷云明代監本刪削亦未舉及此无名氏楊王江上

錄入四庫存目宋內侍梁漢臣爲金人所得謀欲弱金勸金主都燕

京

山營泝梁開海口進兵采石退至瓜洲爲其下所害漢臣殆卽  
琬字

唐人詠馬寬事皆大不敬

悅親樓集

卷十

讀白詩偶有所觸因韻成篇

辛丑年

云玉環工狐

媚天子因蒙塵詩家本忠愛各各歌詠繁特著色荒戒以明喪  
亂原不拘春秋例隱諱爲尊親白傅長恨歌實開傳奇門一笑  
百媚生七字無窮春侍兒扶出浴形容更溫存旣非楊白花飄  
蕩感紅巾又非長髮尼襪跡彰金輪后妃妖冶態臣下豈宜云  
原其立言體濫觴三百篇衛風碩人章所頌君夫人脂膚螭螭  
領細膩如手捫倩盼光合離阿堵能傳神一幅佳麗圖千載猶  
銷魂小君處宮闈出則乘翟輶誰曾親見來寫此嬋娟眞文章  
妙絕世禮教恐未安倘令觸忌諱謂是媒狎言律以大不敬夫

何辭罪愆文人興會到好騁詞藻妍六經不敢議聖人偶未刪  
庸按馮孟亭王谿生詩詳注云杜公北征援引襄妲出於忠憤  
正得小雅之遺若義山華清宮云未免被他褻女笑只教天子  
暫蒙塵與驪山有感云平明每幸長生殿不從金輿惟壽王龍  
池云夜半宴歸宮漏永薛王沈醉壽王醒皆大傷名教漁隱叢  
話曰用事失體在當時非所宜言是也唐闕史鄭相國榮陽公  
改爲鳳翔從事曰題馬嵬詩曰肅宗迴馬楊妃死雲雨雖亡日  
月新終是聖明天子事景陽宮井又何人觀者以爲眞輔相之  
句馮謂超然傑作非義山輩可及林文忠公雲左山房詩集中  
過馬嵬題楊太眞墓八絕末章云籍甚才名長恨篇先皇慚德  
老臣宣詩家解識君親義杜老而還只鄭虔一時傳誦爲詠馬  
嵬絕唱其實本孟亭評與正塘詩也

李正封

養新錄

卷十

今人以李正封詠牡丹詩爲唐明皇時攷唐詩紀事云唐明皇好詩大和中賞牡丹上謂程修己曰今京邑人傳牡丹詩誰爲首出對曰中書舍人李正封詩天香夜染衣國色朝酣酒時楊妃侍上曰妝臺前宜飲以一紫金盞酒則正封之詩見矣大和者文宗年號文宗時亦有楊妃非天寶之楊太真也後人因明皇有沈香亭賞牡丹事誤改爲明皇而不知年號之不合又正封與韓文公鄠城夜會聯句在元和十二年與明皇時代隔遠其爲文宗非明皇審矣計氏紀事編次目錄列於元和長慶諸家之後本無舛譌校刊者以意妄改耳庸按計氏此條略本南部新書甲云大和中程修己以書進見嘗舉孝廉故文皇待之彌厚會春暮內殿賞牡丹花上頗好詩因問修己

曰今京邑人傳牡丹詩誰爲首出對曰中書舍人李正封詩天  
香夜染衣國色朝酣酒時楊妃侍上曰妝臺前宜飲以一紫金  
盞酒則正封之詩見矣据希白此條正作文皇卽指文宗也計  
氏原本明皇應亦作文皇校刊者妄改一字遂致誤爲元宗太  
眞事耳竹汀偶忘新書此條宜引證

走馬川體詩韻評此格乃禁衛所謂促句換韻者

紀文達公評蘇詩次韻黃魯直畫馬代苑中作云此體本之嘉  
州走馬川詩嘉州又本之嶧山碑但碑是四言耳庸按郭麐靈  
芬館詩話卷一云走馬川詩三句換一韻後山谷諸人效之號走  
馬川體不知以前卽有之富嘉謨明冰篇是也柳亭詩話卷十  
則云富嘉謨明冰篇曰陽春二月朝始暾春光澹潭沲施度于  
門明冰時出御至尊每三句換韻凡七轉卽古樂府之解數也

後人合爲一首誤富詩見文粹卷十七柳亭說亦臆度也

### 郢斤

馬朴譚誤郢斤乃匠石事今人多誤用胡廷玉訂譌雜錄云杜詩操持郢匠斤帶匠字說便不妨與夢谿筆談辨郢歌之誤同操觚家不可不知否則必爲魏伯子雜著所訶也

### 夫丁婦王

韓文公陸渾山火和皇甫湜用其韻末云女丁婦王傳世婚洪興祖曰丁火也王水也火女也水男也丁女而爲婦於王故曰女丁婦王一作夫丁婦王亦通夫丁者王也言王爲丁夫也婦王者丁也言丁爲王婦也朱子曰按丁爲陽中之陰王爲陰中之陽故言女之丁者爲婦於王以見水火之相配今術家亦言丁與王合洪氏二說皆是

按張說溫泉箴東山少連曰元冥

氏之子曰王夫妻祝融氏之女曰丁芊俱學水仙是謂溫泉之神  
焉文公之夫丁卽燕公之王夫婦王卽燕公之丁芊質言之  
不過曰北水南火燕公文唐人無不傳習文公用而小變其辭  
詩人所謂喻語耳其說亦古矣升菴全集卷五作女丁夫王董  
彥遠曰元冥之子云云升菴謂韓詩卷五彥遠所解又奇但不  
知所出今星命家以丁王爲淫合不解淹博如升菴亦忘引燕  
公文

七占七字仄句

咳餘叢攷卷二詩句有全平仄者條義山韓碑詩之封狼生羆  
羆生羆帝得聖相相曰度入蔡縛賊獻太廟按尙有愈拜稽首  
蹈且舞句亦七仄字

別離

朱子致蔡元定書云平日相聚未知其爲樂別後方覺闕事可  
歎可歎又云病中塊坐又未能息心休養才繙動冊子便覺前  
人閒略病敗欲以告人而無可告者又不免輒起著述之念亦  
是閑中一大魔障欲力去之而未能麻按張華情詩不是遠別  
離安知慕儔侶十字最寫得出良友離索相思之苦較閨房燕  
昵爲尤難遣也東坡潁州初別子由詩云人生無別離誰知恩  
愛重亦似本茂先若歸震川京邸有懷云人情別離好共處誰  
憐汝反用之尤爲警動非矯語忘情也

甲辛庚辛

思適齋集

卷十

孫可之集跋龍多山錄云起辛而遊泊甲而休

此用書辛王癸甲也湖樓筆談卷六樊宗師絳守居園池記以甲  
辛二字易東西二字顧亭林等之吳人之呼庚癸愚按班固幽



通賦伯祖歸於龍虎蓋謂晉文公出亡歲在卯反國歲在酉耳  
乃以卯主東方爲龍酉主西方爲虎此視樊宗師以東西爲甲  
辛更繚以曲矣第作賦與作記體例不同故樊記有詭異之譏  
而班賦無艱深之誚文體固各有當也茶香室續鈔卷七引菰中  
隨筆云入止都門旣艮坤之闕絕注引章蘇州酬李儋詩都城  
二十里居在艮與坤按此謂一居西南一居東北也而詩文中  
罕有用者庸按元結岵臺銘周行三四百步從未申至丑寅謂  
從西南至東北耳焦竑筆乘續集卷七金陵舊事引洪邁云皆延  
庚揖辛賓夕陽而導初月湖海詩傳卷二程之章齋居漫興云  
石排甲子苔斑瘦魚戲庚辛水影重下句本用古詩魚戲蓮葉  
西而以庚辛代之文人好奇此等澀體偶一爲之可也

不嫁惜娉婷

升菴全集

卷五十八

杜子美詩不嫁惜娉婷

唐按秦州見勅目薛三

監察與二子有故喜遷官兼進索

此句有妙理讀者忽之耳陳

后山衍之云當年不嫁惜娉婷傅粉施朱學後生不惜捲簾通

一顧怕君著眼未分明深得其解矣蓋士之仕也猶女之嫁也

士不可輕於從仕女不可輕於許人也著眼未分明相知之不

深也古人有相知之深審而始出以成其功者伊尹孔明是也

有相知不深確乎不出以全其名者嚴光蘇雲卿是也有相知

不深闕然以出身名俱失者劉歆荀彧是也白樂天詩寄語癡

小人家女慎勿將身輕許人

庸按新樂府井底引銀瓶語應作言

亦子美之意乎

庸按君谿漁隱叢話

前集卷五十一

引王直方詩話云無已嘗作放歌

行兩篇其一云春風永巷閉娉婷長使青樓誤得名不惜捲簾

通一顧怕君著眼未分明其一云當年不嫁惜娉婷傅白施朱

作後生說與旁人須早計隨宜梳洗莫傾城山谷云無已他日  
作詩語極高古至於此篇則顧影裴回銜耀太甚是陳詩凡兩  
絕句升菴刪合爲一康熙字典女部婷字下本之隨園詩話十  
一止錄前一篇不知後篇意尤深遠也

愛閒

陸文裕春風堂隨筆云昔人云讀漢書要取堂扁合作者信難  
宋呂文靖題鏡湖天花寺一絕云賀家湖上天花寺一一軒窗  
向水開不用閉門防俗客愛閒能有幾人來按此見江鄰子欲  
幾嘉祐雜志  
取愛閒二字署山房一軒庸按柳亭詩話卷四庾杲之致劉蚪書  
山水無情應之以會愛閒在我王僧祐爲司空祭酒嘗謝病不  
與公卿遊高帝謂其從兄儉曰卿從可謂朝隱儉對曰臣從非  
敢妄同高人直是愛閒多病耳祐嘗贈儉詩曰汝家在市門我

家在南郭汝家饒賓侶我家多鳥雀儉時簪高一代賓客填門  
僧祐不爲之屈然味其語氣不當是弟贈兄劉夢得功成卻愛  
閒姚武功愛閒求病假杜紫微愛閒能有幾人來俱用其語呂  
文靖題天花寺詩又用紫微據岸舫此條則文靖直盜竊小杜  
文裕攷之未廣也

### 蘇詩

靈芬館詩話卷一東坡詩腹搖鼻息庭花落儻盡當年未足心孫  
樵云腹搖鼻息夢到鄉關槐花撲庭鳴蜩噪晴坡蓋全用其語  
東坡喜記人好語如蟋蟀鳴蟪蛄驚芄花未落松風晚晴之類  
皆貯以備用庸按頻伽此條本猗覺寮雜記今坡集中佛日山  
榮長老方丈五絕之四云食罷茶甌未要深清風一榻抵千金  
腹搖鼻息庭花落還盡平生未足心施注已引孫樵經緯集乞

巧對第償作還當年作平生王文誥編注集亦未言

又卷四東坡詩自王施注後又有查馮兩家添補然尙有未盡者如李憲仲哀詞死者誰不窾用柳子厚天說窾暮以送死注失引次韻蔣穎叔觀鐙詩便因行樂令授甲不用防秋更打冰用北史斛律光傳文宣時周人常懼齊兵之西偏恆以冬月中河椎冰後朝政漸紊齊人椎冰懼周人之偏注亦忘引乃知放翁爲知言麻按王氏編注自謂集注蘇之大成而哀詞但引合注廣韻窾空也觀鐙但引施注唐陸贄傳西北邊歲調湖南江淮兵謂之防秋郭氏此條見蘇海識餘中蓋編注時未見郭書也識餘自云李杜集使事無多爲注已不易本集充溢至十餘倍又其筆鋒觸處便到不可研尋今雖合眾力爲是書僅十得其五耳若欲事事到地斯未敢信又云更益以三十年之功此

集不能逐一注明其事而前人援據多在皮毛之間不關痛癢亦得失寸心知之言也

楊世昌

蘇詩蜜酒歌引西蜀道士楊世昌善作蜜酒施氏注曰先生楊道士書一帖云僕謫居黃岡縣竹武都山道士楊世昌子京自廬山來過予其人善畫山水能鼓琴曉星厯通知黃白藥術可謂藝矣又一帖云十月十五日夜與楊道士泛舟赤壁按孔毅父韻第三首載西州楊道士凡數聯因此帖知爲世昌詩中又言善洞簫其自廬山從公蓋王戊之夏前赤壁賦云客有吹洞簫者殆是楊也庸按咳餘叢攷卷二云次孔毅父韻不如西州楊道士萬里隨身只惟兩膝又云楊生自言識音律洞簫入手清且哀則世昌之善吹簫可知匏庵藏帖信不妄也庸謂施氏

云殆是爲然疑不定之辭何耶文忠與滕達道尺牘第五十八亦云楊道人名世昌縣竹人多藝然可閑攷驗亦足以遺懣也留此幾年與之稍熟

柳亭詩話

卷二

十一吳匏庵過赤壁詩西飛孤鶴記

趙誤作去

何詳有客

吹簫楊世昌當日賦成誰與注數行石刻舊曾藏自注云世昌縣竹道士與東坡同游赤壁所謂客有吹洞簫者卽其人也按王局文云元符

應作豐

五年十二月十九日東坡生辰置酒赤壁

有進士李委作鶴南飛以獻豈所謂二客者卽楊李二人耶抑

郭石二生耶世昌又見蜜酒歌序并次韻孔毅父三首之末今

畫家作赤壁圖不畫道士而畫一僧指爲佛印且又指一人爲

黃山谷不知何所據耶長公外紀作郭尤二生

庸

按施注蘇詩

傳本久佚康熙中宋商邱得其殘帙屬青門補綴刊行故明時

吳文定 國初柳亭皆未之見趙亦但引王注無以援證賦語  
柳亭謂菀庵之說不知出何書堅瓠丁集卷三亦謂微菀庵表而  
出之世昌幾無聞矣職是故也高似孫緯略載縣竹道士楊世  
昌南雷詩歷三卷自注同若潛邱札記卷一東坡次孔毅父韻第三  
首云云此縣竹武都山道士楊世昌字子京也又云西蜀道人  
楊世昌則在施注已行之後然皆不引與滕牘蓋蘇集詩文繁  
夥翻檢難周非憚於搜討也蒿庵閒話卷二則引與范子豐書謂  
吹洞簫者卽李委乃云是楊世昌得之石刻則何說不知委善  
吹笛與洞簫不同也

柴惟吉

隨手雜錄太祖初入宮見世宗子與潘美爲姪後終刺史名惟  
吉潘夙之祖也肅按默記同惟吉作惟正五代史周家人傳世



宗七子長次三皆為漢誅次恭帝次曹王熙讓次紀王熙謹乾  
德二年卒次斬王熙誨不知所終疑即惟吉也高已生錫蕃五  
代宮詞陳橋驛畔黑摩天誰抱孤兒拜向前臣有真言君曲賜  
潘家添得一支傳即詠此事語本默記也

五日生

周元公生於天禧元年五月五日鄭虎文吞松閣集中有代書

熊太史五十生日白壽詩後一篇歷舉五日生以位顯者云田

文史記狡王鳳西京雜記擅胡廣世說詔王鎮惡宋書貪徒以富貴震耀以

文顯者獨崔信明唐書顧於德行無聞云云竟忘卻元公道學餘

叢攷卷三十七校詳趙元昊姝齊南陽王緯魏屈原辭辭翁應龍宋徽宗楊繼遼懿德皇后又劉錫五隨侯

書屋集五日詩詠古凡數十人人各一絕徵引較鄭為夥亦不

及元公豈以濂谿大儒不當與孟嘗君諸人並入吟詠耶攷度

正撰元公年譜但云宋眞宗天禧元年丁巳月日先生生於道州營道縣之榮樂里濂谿保不言五月五日

戴敏絕句

三台詩話嘉興府志宋張子修監石門酒稅因家焉與邑人張汝昌並擅園林之勝內有流杯亭遂初亭乳鴨池所云東西張氏園也戴敏游張園詩乳鴨池塘水淺深熟梅天氣半晴陰東園載酒西園醉摘盡枇杷一樹金非但工雅正復切題然自劉後邨千家詩已誤爲其子石屏作元時諸孫文瓚刻石屏集附東臯集一卷始改正第其名又爲耽而非敏當再攷之庸按戴石屏詩集明云先人諱敏不知文瓚何以云耽豈二名耶敏字敏才號東臯子

元遺山句

妙香室叢話

七卷

遺山七律步武少陵如三年浪走空皮骨四海

相望只弟兄又黃耳聽從秋後到白頭新自夜來生俱新穎可

喜至并州倦客初投迹楚澤寒梅又著花以及滿眼旌旗驚世

路閉門風雪羨山家等句雖少陵不是過也又春風碧水雙鷗

靜落日青山萬馬來清明寒食連三月潁水嵩山又一年樂事

漸隨花共減歸心長與雁相先三秦形勢無今古千里傳聞果

是非細水浮花歸夕澗斷雲含雨入孤村案上酒杯聊自慰袖

中詩卷欲誰親華胥夢破青山在梁甫吟成白髮催百年星斗

歸天上萬古旌旗在眼中皆名句也

庸

按遺山全集新穎名句

何啻於是歐北詩話

八卷

摘其白首又多兵死鬼青山原有地行

仙

蛟龍

豈是池中物蟣蝨空悲地上臣

又

只知霸上眞兒

戲誰識神州竟陸沈

蕩蕩

青天非向日蕭蕭春色是他鄉

徐送

戚卿只知終老歸唐土忽復相看是楚囚日月盡隨天北轉古今

誰見海西流州鎮千里關河高首馬四更風雪短檠燈還氏贈官

不暇如平日草詔空傳似奉天感時論事聲淚俱下然

細水浮花歸別浦二句乃韓偓春盡句遺山易漾夕澗三字顧

氏云隱右詩五六全用韓致光語卽以空傷時語留與

纍臣一斷魂標出自成一體遺山詩用前人成語極多陶杜句

尤甚白頭句似指白髮頭則何得云夜來生也雖本少陵白頭

搔更短然杜句有語病湖樓筆談卷謂髮可言短頭不可言短

元又何可襲乎

### 高房山詩

靈芬館詩話卷三載高房山過信州云二千里地好耕桑無數海

棠官道傍風送落花攬馬過春風更比路人忙庸按吳禮部詩

話引此詩好耕桑三字作佳山水

青邱詩

歐北詩話卷八李青蓮詩從未有能學之者惟青邱與之相上下  
不惟形似而且神似青蓮樂府及五古多主敘事不著議論蓋  
用古人意在言外之法此古詩正體也青邱樂府及擬古十二  
首每感二十首秋懷十首詠隱逸十六首亦只敘題面不復於  
題面內推究意義發揮議論如詠向長則但說長之畢昏嫁游  
名山詠周黨則但說黨之辭徵聘樂田里而一種邁往高逸之  
致自見於楮墨之外此正是學青蓮處七古內如將進酒將軍  
行贈金華隱者題天池石壁圖登陽山絕頂春初來憶昨行等  
作置之青蓮集中雖明眼者亦難別擇然青邱非專學青蓮者  
如游龍門及答衍師見贈等作骨堅力勁則竟學杜太湖及天

平山游城西贈楊榮陽寄王孝廉乞貓等作長篇強韻層出不窮無一懈筆則又學韓送徐弋往蜀山書舍古體帶律奇峭生硬更與昌黎之答張徹如出一手集中本有效樂天體一首又聽教坊舊妓弟子陳氏歌一首亦神似長慶中秋玩月張校理宅又似李義山玉波冷雙蓮及鳳臺曲神絃曲秦箏曲待月詞春夜詞黑河秋雨引又似溫飛卿蔡經宅及書夢贈徐高士送李外史等作又皆似黃庭經可見其挫籠萬有學無常師也肅按歸愚明詩別裁亦謂侍郎詩上自漢魏盛唐下至宋元諸家靡不出入其間所選皆最上者而五古錄塞下曲悲歌顧榮廟支遁庵僅四首七古則憶昨行寄吳中故人贈金華隱者聽教坊舊妓郭芳卿弟子陳氏歌外又明皇秉燭夜游圖登金陵雨花臺望大江張中丞廟唐昭宗賜錢武肅王鐵券歌共八首五

律三首七律五首七絕二首大凡二十二首於青邱佳處未盡  
不若甌北所論得侍郎之深也查他山詩得力於蘇而神似劍  
南甌北以當十家之一後人多訾其偏然歸愚所錄五古一首  
七古四首七律五首五排一首七絕三首大凡十四首敬業堂  
集具在佳篇奚止於是乎

入情愈工愈成宋調

文入情易入稗詩入情易入俚此中消息惟多讀書者知之佔  
畢叢談卷五宋元人詩如范石湖事如夢斷無尋處人似春歸挽  
不留白玉蟾既去復來秋後暑似無還有雨中山陸放翁髮無  
可白方爲老酒不能賒始覺貧劉子翬百年未半老相偕四序  
平分秋獨愁劉克莊按行花木皆僚友主掌湖山卽事權愛敬  
老梅如宿士護持新筍似嬰兒寫情景可謂入妙所嫌者詞不

典貴去風雅益遠明鍾伯敬子姪漸親知老至江山無故覺情  
生許相卿老如舊歷渾無用病戀殘鐘亦暫明入情愈工愈成  
其爲宋調庸按伯敬句見隱秀軒集字集九日携姪昭夏登雨  
花臺台仲句堅瓠戊集卷三作張東海彌除夕詩病作生

### 陳黃

國朝詩家林立施宋王朱趙查諸公兩大而未能獨步迄今猶  
聚訟焉李西漚宮贊祁祁詩稿卷二有二百年來詩人無出黃仲  
則之右者頃得陳元孝詩讀之因題卷末一絕云詩家要與古  
爲新胎息深時氣味醇後有兩當前獨漉中間參立更何人味  
先生句似 國朝祇此二家無參之者瀟雪大不平之予謂元  
孝同時與屈翁山梁藥亭稱嶺南三大家而後人少之欲以黎  
二樵易梁仲則同時與張船山齊名幾如宋之坡谷而或以船



山詩天才勝而人功淺不及兩當之深詣北江謂船山劍氣七分珠光三分仲則珠光七分劍氣三分然則西漚以陳黃爲兩大豈一人之私言乎

陳忠裕詩本文山

歸田詩話文山指南錄爲或人賦詩黑頭爾自夸江總冷齒人能說稽公謂有所指何義門困學紀聞卷十評云此詩殆指留夢炎庸按三岡識略卷一无名人虎邱題壁詩黑頭已自羞江總青史何曾用蔡邕爲錢虞山而作實本文山

詩用事不露痕迹

池北偶談

卷十

用事條作詩用事以不露痕迹爲高往董御史

玉蚪

外遷隴右道留別予輩詩云逐臣西北去河水東南流初

謂當語後讀北史魏孝武帝西奔宇文泰循河西北流涕謂梁

禦曰此水東流而朕西上乃悟董語本此深歎其用古之妙黃

仲則春水將生君速去此江東下我西行亦爲兩當軒

卷三十

夜舟次送別集中隽句膾炙人口不知乃自董玉蚪來若菊坡

詩話全詩話邵兼山詩眞州別蔣湘帆詩云春水方生君又

去此江東下我西迴黃僅易方又迴三字嚴海珊東同年金蒿

亭明府云春水方生公欲咳餘叢攷卷二去桃花淨盡我重來

之句上句與兼山同下句用劉夢得詩雖情意各殊以云屬對

兼山似勝海珊若鄧湘皋南邨草堂詩鈔卷十泊衡山重寄雲

渠云江水東行我西上嶽雲北去雁南飛則上句用北史下未

知所出似句法無心闇合不必芝蓋青旗有意沿襲也

### 注詩難

注古人詩最難卽近人亦復不易東坡逸詩有山人更喫懶殘

殘句敬業堂詩集

卷七

題吳寶崖雪籠煨芋圖云何似雪籠風

味好平生不喫懶殘殘本之文忠顯北李郎曲生平不喫懶殘  
殘直用初白末句云李下何妨一整冠人以爲用古詩李下不  
整冠句不知本元遺山題山谷小豔詩只消一句脩脩利李下  
何妨也整冠也所謂故事中再加故事若此者豈易注出處乎

### 柳亭詩話

羅蘿邨

坤

柳亭詩話敘

康熙丁亥三月朔

云昔施愚山先生嘗語予曰

凡操觚家立說著書雖多述而不作要必有益於見聞有徵於  
典冊斯爲最上一流是時徐子伯調在坐亦曰近來作者如雲  
大率寡見尠聞逞一時瀾翻浩瀚不能援證古今卽其自相牴  
牾殆不知凡幾蓋甚言述作草草難垂永久爲可太息耳岸舫  
推重名場幾四十年甲申春客廣陵柳亭銷夏著有詩話自三

代以迄今茲凡涉於詩句詩聯詩之格律詩之長短本末名物

象數罔不兼收畢舉而一字半語具有根柢正譌闢謬裨益無

窮且於運會興衰之際民彝物則之恆淵源家學投贈綢繆一

一闌入庸按岸舫此書援證古今頗具根柢正譌闢謬有裨詩

家惜間有牴牾蘿邨敘未免阿好庸曾採入數條今坊間已有

重刻本此不具列卷一陸宣公奏議曰蠶事方興已輸縑稅農功

未艾遽欲穀租有者急賣而耗其半直無者求假而費其倍酬

夷中蓋用其語後四句則與李紳全同卷二雨過草芊芊連雲鎖

南陌門前君試看似妾羅裙色此江總妻詩也具此才情當日

必與袁大捨輩倡和而何以別無流傳也白香山誰開湖寺西

南路草綠裙腰一道斜用其語意卷三五言短古子夜讀曲神矣

太白摩詰已入化境七言短古梁簡文帝擅其長繼之者前有

徐陵後有李賀陵之鳥栖曲曰繡帳羅幃隱燈燭一夜千年猶  
不足惟憎無賴汝南雞天河未落猶爭曉賀之胡蝶飛曰楊花  
撲帳春雲熱龜甲屏風醉眼纈東家胡蝶西家飛白騎少年今  
日歸譬諸短兵相接足以辟易萬人二首之外不多見也劉靜  
修詩若將文字論心術恐有無窮受屈人眞長者之言卷四盧全

自號僻王鶴脉經

按字書無脉字似謬

曰山海經乃夏后師雲華子著梁

江海嘗欲爲赤縣經以補山海經之缺未成謝莊詩山經亟旋

覽水牒倦敷尋

皮日休經山疏不離身

水

時酈道元未出無由知其端緒

耳吳立夫曰胸中無三萬卷書眼中無天下奇山水未必能文

縱能亦兒女語耳

卷七

倪文正題徐岱淵別業

名園亭記

見越中

云

蓄樹勝求佳子弟擁書權拜小諸侯用事雅台李慶孫弔錢熙  
詩四夷妙賦無人繼三酌酸文舉世傳熙嘗獻四夷來王賦及

三酌酸文乃宋人也賈捐之與友人箋曰午夜一鐙展窗萬字

豈肯爲此沾沾作酸文耶熙蓋用其語

卷八

鄭都官榆錢詩買花

不得買愁來瓊州臨高縣有買愁邨胡澹菴南遷過此賦詩曰

北往常思聞喜縣南來怕入買愁邨區區萬里天涯路野草荒

煙正斷魂買愁二字甚新近人

呂

志有買愁集四種或作賣愁集

以矯之謝眺登孫權故城詩江海旣無波俯仰流英盼李太白

翰林秉筆回英盼出此

卷十

張九一與吳霽寰書名敵則相掩位

敵則相陵女並寵者妬雀並枝者啅勢使然也隋煬帝黃梅雨

細麥秋輕王季重曰梅雨在四五月如婦人之怒易構而難解

按東坡席上代人題別又如少年無行子盟在耳門須臾翻覆

已云淚眼

似海雨

取喻奇而確

卷十

上官昭容游長甯公主流杯池詩仰循茅宇

俯眄喬枝煙霞問訊風月相知似銘似贊宜乎秤量天下人物

卷十 老杜瘦馬行此豈有意仍騰驤用史記鄒衍傳此豈有意  
阿世苟合而已哉諸葛一首伯仲之間見伊呂指揮若定失蕭  
曹上句用典論傳毅與班固伯仲之間耳下句用陳平傳誠能  
去兩短集兩長天下指揮則定矣庾子山有云胸中無學猶手  
中無錢欲爲詩者斷須自博學始卷十官妓之設卽漢人宮婢  
之遺宮婢不知革於何時若官妓則自唐迄宋相沿不改明初  
亦有十四樓之設至顧總憲佐始奏除之左蘿石北使作絕命  
詩曰丹心碧血消難盡蕩作寒煙總不磨當與文山並傳若張  
元著則似疊山吳筠詩才勝商山四名高竹林七此縮腳字之  
始卷二東漢吳蒼遺矯慎書乘雲行泥棲宿不同晉丁彬書雲  
泥異途邈矣懸隔二字所自始卷二後漢書耿恭謂岑彭曰方  
今漢基頽圯英雄寒餓杜牧之自序本此卷二論衡曰居不幽

則思不至思不至則筆不利於超奇篇極推周長生洞厯今并

亡矣

卷二十七

李荷澤選皎然

詩有三癸亭一首發端曰秋意西

山多列岑繁左次繕亭厯三癸疏趾鄰佛寺自注云以癸丑歲  
癸卯朔癸卯日立故名王彝題太白像曰青天無人代天語一  
星西落銀河渚通首傲岸可以呈似青蓮

卷八竺法深謂支道林曰未聞巢由買山而隱固知朱戶不若  
蓬門也于頔乞戴符買山錢百萬事與郝超同符豈安道苗裔  
耶盧天驥詩未有買山錢愁聞有山賣劉改之賀徐直院啟以  
載鶴之船載書入覲清標如此移買山之錢買硯平生雅好可  
知直院者淵子也嘗有詩曰俸餘欲辦買山錢卻買端州古硯  
甌依舊被渠驅使在買山之事定何年啟蓋用其詩語庸按戴  
符乃符載之謫長白殆讀麻沙本倒其字故有安道苗裔之誤



解四語宜刪去

詠史詩

詠史詩以翻陳出新爲佳如錢竹汀過安陽弔韓侂冑

見隨園詩話卷

二云匆匆函首議和親昭雪何心及老秦一局殘碁偏汝著于

秋公論是誰伸橫挑強敵誠非計欲報先讎豈爲身一樣北征

師挫衄符離未戮首謀人王葑亭張麗華祠

見兩鄉詩話卷十三

云臨春

豔質已成空留得遺祠傍故宮直以捐軀酬後主更能假手報

高公青谿幻影沈秋月翠幙生香颺晚風畢竟國亡能一死後

庭狎客有誰同二詩工力悉敵讀者以爲懷古極作

清

按潛學

堂詩集續

卷二

過安陽有感韓平原事四首云十年富貴老平原

一著殘棋一局翻畢竟未忘青蓋辱九京不愧魏公孫胷無成

算擲千鈞壯志區區那得伸一樣北征師挫衄符離未戮主謀

人匆匆函首議和親昭雪何心及老秦朝局是非堪齒冷千秋  
公論在金人成敗論人亦可嗤誰持秦鏡照鬚眉如何一卷奸  
臣傳卻漏吞舟史太師則爲七絕子才所錄殆其初稿也符離  
之潰據宋史魏公本傳隆興元年除樞密使都督建康鎮江府  
江州池州江陰軍軍馬時金將蒲察徒穆及知泗州大周仁屯  
虹縣都督蕭琦屯靈壁積糧修城將爲肅攻計浚欲及其未發  
攻之會主宰殿前司李顯忠建康都統邵宏淵亦獻擣二邑之  
策浚具以聞上報可召浚赴行在命先圖二城乃遣顯忠出濠  
州趨靈壁宏淵出泗州趨虹縣而浚自往臨之顯忠至靈壁敗  
蕭琦宏淵圍虹縣降徒穆周仁乘勝進克宿州中原震動孝宗  
手書勞之曰近日邊報中外鼓舞十年來無此克捷浚以盛夏  
人疲急召李顯忠等還師會金帥紇石烈志甯率兵至宿州與

顯忠戰連日南軍小不利忽諜報敵兵大至顯忠夜引歸浚上疏待罪有旨降授特進更爲江淮宣撫使宿師之還士大夫主和者皆議浚之非孝宗復賜浚書曰今日邊事倚卿爲重卿不可畏人言而懷猶豫前日舉事之初朕與卿任之今日亦須與卿終之是役迺孝宗與魏公主之師之挫衄當坐李邵若必戮首謀獨不爲孝宗地乎至張貴妃則陳書附沈皇后傳云及隋軍陷臺城妃與後主俱入於井隋軍出之晉王廣命斬貴妃勝於青谿中橋隋書高穎傳云及陳平晉王欲納陳主寵姬張麗華穎曰武王滅殷戮妲己今平陳國不宜取麗華乃命斬之王甚不悅又云煬帝卽位以爲謗訕朝政於是下詔誅之或以爲猶憾前諫麗華故然麗華相隨入井本無捐軀殉主之志脫晉王不納穎言與後主俱入長安亦當與沈后煬帝每所巡幸恒

令從駕詩家喜爲美人開脫以國亡一死予之過矣傳末又載  
魏徵云後主自居臨春閣張貴妃居結綺閣龔孔二貴嬪居望  
仙閣其窗牖壁帶懸楣欄檻之類並以沈檀香木爲之又飾以  
金玉閒以珠翠外施珠簾內有寶牀寶帳其服玩之屬瑰奇珍  
麗近古所未有每微風暫至香聞數里朝日初照光暎後庭五  
六二句所本也

霞外攬屑卷八下

香雪崦芊書丙集

山陰 平步青 景孫 纂

眠雲舸釀說下 詩話

申定舫樂府

申定舫檢討

涵勝

晁盟先生弟也史續七十首蓋仿西涯樂府

而作言遠旨賅論嚴語雋宋荔裳作敘極推之謂刻畫妙在不盡祝西涯尙覺過之不獨音節之妙也銅雀臺云銅雀臺分香履一代雄風長已矣臺上月明臺下流水佛骨表云欲佞佛及於骨然頂焚指意在獲福謂可不死耶佛如不死那得骨二首尤冷隽

周櫟園秦淮詩

賴古堂集中舟中與胡元潤談秦淮盛時事次韻四首風麗芊

蘇不類減齋本色詩云紅兒家近古青谿作意相尋路已迷渡  
口桃花新燕語門前楊柳舊烏啼畫船人近洲簾緩翠幔歌輕  
紈扇低明月欲隨流水去簫聲只在板橋西曲曲銀河盪晚霞  
蘭叢玉瑟閒琵琶暗潮夜溼依闌石細雨朝開隔岸花菡萏無  
心臨翠蓋芙蓉有意映窗紗雲鬢月底分明畫妒殺垂楊一半  
遮不分合歡夜不開吹笙無力自徘徊鐘聲漸遠隨波去花氣  
將眠過渡來曲曲兜央流豔夢垂垂楊柳捲深杯一生明月秦  
淮好到眼煙雲第幾回拂水藏鴉弱自持輕寒簾外影離離風  
吹香動花無骨露偏歌清月有絲漁笛暗隨紅雨落酒壚閒受  
綠陰支鍾山松老雲霞漫近日金陵百不宜眞子野所謂每聞  
清歌欲喚奈何也漁磯漫鈔卷四僅載其第一首雪樵居士秦淮  
聞見錄全載之簫聲作洞簫瑟作色不分作誰識百作客刻入

虞初續志卷十二

潛邱詩

聽松廬詩話簾紋如水曉驚秋推枕尋釵搭臂搆郎困宿醒猶未起一簾微雨看梳頭此閭潛邱絕句也風調絕類晚唐人吳石華跋石洲潛邱年譜云詩非先生所長山西通志稱其尤嗜吟詩類張籍王建古樂府石洲謂此皮傅之論未足爲先生榮然嘗賦絕句云云亦非尋常學究所及庸按潛邱劄記卷六隴右倡和集移寓雜興贈陳子壽五十首其二十一卽此詩自注末句乃子壽湖州豔體詩也余愛而足之則此詩本偶然拈詠泥自義山貪讀道書慵未起水晶簾下看梳頭來耶

宋荔裳廉使女

國初詩家稱南施北宋而荔裳廉使身後最爲苓莪可憐康熙

王子擢蜀泉癸丑入覲甲寅蜀亂妻帑皆寄成都荔裳鬱鬱殞  
於京邸敬業堂詩集

卷三

中山尼七古一篇爲荔裳女而作云中

山女尼顏似玉布襪青鞵行不白日潛形灌莽中逢人不敢  
吞聲哭自言生長本名家阿父才名宋玉誇千里飄飄隨遠宦  
一家迢遞入三巴養成嬌女嬌無偶掌上明珠睡隨口花前侍  
妾盡知書鏡裏新妝時學母自從觀察去朝天官署清涼遂可  
憐寇盜西南俄阻隔葦氛狼藉埽東川孤兒寡婦皆臣僕翠輿  
牽蘿行補屋賣散平頭計漸貧嫁分紅粉身何獨飄零無賴到  
南遷夫壻移家遠入滇幾夜新婚成永訣旋收戰骨葬江邊早  
年淪落多關命石上三生眼前證便道情緣著死灰行依心月  
開圓鏡小鬟何意尙隨身宛轉青絲手共分金翦無聲雲委地  
寶釵有夢燕依人扶攜同向中山寺改口人前喚師弟別與繙



經起法名慶光舊是閩中婢皓齒明眸兩比邱久拚生死等浮  
漚香鐙繡佛前因在從此相依擬白頭晨鐘暮鼓流光易荏苒  
今年三十二骨肉深恩且勿論滄桑時局關何事何當六詔又  
屯師十月孤城乍解圍將軍奏凱功無敵悍卒按牢勢不支移  
巢拔穴驅人起但是有身無避理一朝蓄髮強同行幾度剗刀  
猶不死歸程昨夜次偏橋哀角吹殘令寂寥卻喜道旁俄見棄  
草閒趺坐度清宵同行偶傍江東客指點雲山曉來跡雙江暫  
擬尋同伴半路又驚逢邏卒太守呼來淚未乾含嚔一一語悲  
酸亂來莫說爲官好兒女姻親那得完夢裏生還愁故里依稀  
記得萊陽是已作昆明劫後人托根何必仍桑梓君不見列帳  
西來珠翠圍忽忽粉鏡去如飛不知阜帽天涯住何似紅裙馬  
上歸据夫壻移家遠入滇及旋收戰骨葬江邊句則其壻殆從

軍雲南陣亡不知何姓名中山寺殆亦在滇據今年三十二句  
他山是詩作於王戌則其女當生於順治辛卯據蓄髮強同行  
句則辛酉雲南收復爲悍卒所掠至偏橋始棄去太守不知何  
人胡不爲收卹名門婦女夫亡祝髮遭此淪落不知後歸何所  
王文簡公有久不得荔裳妻孥消息詩云九原悲馬鬣八口寄  
蠶叢施愚山見朱荔裳遺詩悽然有作云張堪妻子應誰託巢  
卵長拋虎豹叢王又云宋劬後二十八年子思勃來京師以入  
蜀集相示則在壬午去壬戌又二十年不知姊弟終得完聚否  
桐陰清話卷二引拜經樓詩話云尼名道啟此余辛酉聞亂集隨  
園詩所謂逐漸闌珊誰護惜幾枝零落在天涯烏虜秀容縱騎  
奪堦瑤光汾陽功高紅綃入院今之按牢逢邇者豈獨一中山  
尼哉

張文和公風鳶詩

茶餘客話

卷四

載張文和公風鳶詩云九霄日近增榮彩四野風

多仗寶繩隨園詩話

卷四

同張南山詩人徵略引爲其父文端公

誤文和久直揆樞渥承

恩遇而晚年與西林溧陽皆不合故有次句文端則

賜金歸老頤志龍眠安慮野麕排撼乎文和後以

予告未親詣 宮門泥首及朱荃案遭

嚴旨詰責而砌後仍配享

大丞

聖明保全蓋亦

鑒其一生醕謹無他詩亦先識也

費鹿峰詩箋

新繁費此度密朝天峽之大江流漢水孤艇接殘春十字爲漁  
洋所激賞歸愚尙書採入別裁其鹿峰集今鮮傳本友人宋錫  
廷藏有費詩箋一草書十二行字仿大王云暫辭鵲鷺護吳西  
全郡平甯秩轉躋青瑣高名傳四國朱輪迴軫鎮三齊長留父  
老思膏澤竝見公卿賁紫泥他日從公觀海曲春原沙路馬頻  
嘶太守蔣公以侍從出守吉安近遷山左監司必游匡廬居  
公署中賦一首奉送辛酉中秋書費密稿下有鄭密長方陽文  
印章一泛然酬應之作猶是七子遺響集未必存威鳳片羽亦  
不可輕棄也又有七絕一紙行書云不愁伏櫪起長嗟不羨空  
羣向客誇柳下清陰方草地閒調玉勒爲看花禮華主人徐步  
雲下有禮華居士陽文方章一禮華興化人乾隆壬午  
召試中書充軍機章京戊子以兩淮提引案與王蘭泉趙損持

同罷官者

屈悔翁

屈悔翁

復

晚號金粟道

一作老

人家世莫得而詳同徵友長洲馬

力臣

堞

敘其詩謂楚系而家秦年二十五東游流寓郟城最久

中更齊魯燕趙吳越閩粵垂老客京師以詩教授武陵楊文敏

太宰時爲刑部右侍郎薦舉博學鴻詞三徵不起賦感遇五古

三十首年七十餘復游郟歸蒲城卒鄭荔鄉撰小傳

今藝苑摺華本無之

見補水王氏十家詩鈔

云弱水無子立族人爲曾孫程縣莊譏其不講於

禮詩多殘山賸水之思麥秀黍離之感若夏肄周遺之所爲作

又或附鳳攀龍與前朝有瓜葛者其論詩於比興之外專以寄

託爲主謂陶之飲酒郭之游仙謝之登山左之詠史彼自有所

以傷心之故姑借題發揮必執是數者求之固矣

庸

按集中過

貞賢里詩自注歲丙寅予年十九則生於康熙七年戊申其時  
永明久滅天下大定荔鄉所謂附鳳攀龍固未覈實貞女吟鄭  
注云戊戌怡賢親王未封時有薦弱水入邸歲幣千金固辭乃  
止其詩云細微鴻鵠志願終此清白亦未有周遺意也惟詠古  
十首以夷齊魯仲連留侯居首邵康節申屠蟠居末似有感而  
作過流曲川詩序以王永強大同人前綬德鎮副總兵戊子十  
二月舉兵應姜瓖已丑三月陷延  
安榆林等十九州縣又破同官縣敗於朱原鎮自益貳臣張天  
福傳云六年三月延安參將王永強叛陷延安榆林及同官臨  
潼等縣天福同吳三桂都統之恢復未成爲憾而極詈吳三桂  
李同翰從間道擊大俘獄之毒殺又三月二十八日登東城樓感往事作五律十首自注  
事詳流曲川詩序中有云百年又三月往事此重闔降將豺狼  
性孤城蟻蝨臣御座供麻經威儀忽漢官明倫方痛哭戰士已  
凋殘三十一年後遙遙鼙鼓來南天多美醞八面有觀音人說

宗權反由來無此心天心終厭漢牧豎豈無人未云中有吾家  
季時危守北城敵人驚鐵面從此有驍名霧塞昏天地煙銷隔  
死生高堂今白首哭弟淚交橫是弱水之叔曾預其役事在順  
治六年下距弱水之生二十年似其父或仕勝朝而其名不可  
攷矣同治癸酉浙江六十八名舉人石門屈元所行卷首履歷  
云十二世祖冲宇國初布衣著有楚辭注義山詩箋弱水詩鈔  
等集行世豈孝廉卽弱水所立曾孫之雲孫冲宇乃其本名抑  
別一布衣同姓者錄悔翁所作後人不察誤以爲冲宇著述耶  
弱水有玉谿生詩意八卷殆卽所謂義山詩箋非有二書也  
弱水詩道源少陵七古閒學昌谷最長於七律如旅懷三首秋  
懷八首登岱五首戊戌春日雜興十八首秋日雜興二十首錢  
唐懷古十首沈鬱頓挫忼慨悲歌眞浣花嫡乳也論詩絕句凡

二十四首茲錄其十三云李杜文章妙入神中原逐鹿幾千春  
捉刀猶帶英雄氣遙想嚴公第一人難將成敗論人文語出賢  
豪氣逸羣若許并州劉越石六朝誰不少風雲空裏閒雲首尾  
無一鱗半甲有何殊滿城風雨吳江冷可是驅龍領下珠東南  
孔雀自高飛盡學邯鄲步總非惟有北征貫日月遙從天漢載  
支機才高八斗雨天人語不驚人泣鬼神海岳何曾有高下纖  
兒偏袒總難論一代高才老嫗傳卻嫌脂粉浣天然人間那得  
真西子顰殺雙眉諸少年江左風流事已遙當時金粉尙魂銷  
從他嗤點流傳在畢竟何人見六朝先知兵馬備遼東撼樹蚍  
蜉恐未工俊逸終憐何大復粗豪不羨李空同

二句本薛惠考功集戲成五絕

句但易解爲羨耳

三代而還盡好名文人自古善相輕鍾譚死後虞山

出從此前賢畏後生萬紫千紅粲以繁野花結子也堪餐苦將



心力成孤詣不敢隨風薄宋元遠宗樂府步邯鄲近鹽妃瑤咽  
廢餐自是無人求古意月明河海大江寒文章生死判升沈憶  
奉漁洋適古吟此日盡譏好聲調披沙那肯揀黃金好花一樹  
幾枝紅祇在佳人採擇中辛苦世閒莽兒女拾將零落罵春風  
似亦兼綜博涉轉益多師不薄宋元尤爲通識

別裁集卷十二  
孫枝蔚小傳近

有秦人曾無典籍好爲大言至云作詩先洗去李杜俗調庸妄  
如此而人羣然信之云遠勝前人不可解也按秦人卽梅翁

### 陳慕陵詩

陳無波徵君

榮杰

著有慕陵文集四卷慕陵詩稿四卷候蟲集

八卷集唐詩八卷夢香詞二卷客死荆門時行匿多散軼孫松  
齡掇拾得樂府十一首五古五十首七古二十一首集句一首  
五律一百二十六首集句八首七律七十八首集句四十八首  
五排一首五絕七首七絕二十八首編爲二卷仍名慕陵詩稿

昌於嘉慶癸亥始槩行附松齡大巖贖草於後詩僅二十一首  
有竹汀錢氏阮文達公兩序徵君詩善往復自道顛顛感槩而  
不底於怨五言高遠得唐人之遺各體亦詞必已出意思深長  
五言如田家茅作屋戍堡礮支牀相逢皆異地深坐有孤鐙松  
濤迴洞壑草色上人衣旅愁逢莫慘鄉夢入秋孤微軀輕異地  
尊酒有他年荒邨連古戍殘葉下寒雲獨鳥衝雲沒孤帆隔浦  
迷涼風蘇鶴病細雨溼苔痕虛沙崩古岸飛瀑落荒城黃沙依  
岸盡白日落江寒曉雲分斷岸秋色上孤舟殘城崩急雨古屋  
沒寒灰林花紅墜墜谿雨白連山暮雨懸江急風花墮地遲斷  
礮流雲去餘霞送鳥還俸薄惟留鶴公餘只賦詩山荒因石瘦  
蕨淺得雲肥倦眼看雲變閒心驗草生湖光分月白松影帶霞  
青七言如閒歌楚些招新鬼不分齊諧老此身孫懸古樹窺潭

水燕入低窗墮野花皆可入摘句圖也

柳亭詩話

卷三

云文信國集杜有二百首王文節思任集陶爲律

三十四首沈太常延銘集唐至數十卷各體皆備施廣文端教

集唐至三千首皆絕句

三岡識略卷五云施字匪莪泗上人嘯

贈人卽七律二首

柳亭之言未核無波徵君之舉鴻臚也以鍾中丞見其春夏

秋冬登黃鶴樓集唐三十二首愛而薦之春云江邊黃鶴古時

樓

白居易

崔顥題詩在上頭

無名氏

一自神仙留笑語

李山甫

至今鄉

土盡風流

李遠

吟哦但寫胸中恨

許堅

簡貴將求物外遊

韓偓

莫道昔

人曾閣筆

嚴維

才非白雪也賡酬

張泌

高樓突兀倚晴空

李中

豁目開

襟許暫同

楚令狐

丹壑樹多風浩浩

許渾

綠楊煙暗雨濛濛

韋莊

數聲

清磬是非外

貫休

一縷鴻毛天地中

白居易

黃鶴有心多不住

劉滄

欲

將遺跡問仙翁

張泌

敝盡軒窗四望賒

來

大江橫抱武昌斜

魚元

機

鳳皇山上雲垂暮

高鶚

鷓鴣洲

頭浪颭沙

劉禹錫

渡口殘陽千鷺跡

張南史

雨中春樹萬人家

王維

難摹好景獨搔首

白居易

欲借江郎五

色花

陳羽

黃鶴心期擬作羣

皎然

仙鄉來禮紫陽君

李中

誰知野性真

天性

杜牧

拋卻青雲歸白雲

白居易

明月斷魂清靄靄

高蟾

落花飛絮

亂紛紛

鄭谷

樓頭臉有情難說

楊汝士

徒望朝嵐與夕曛

李商隱

萬里

迷魂不可招

胡宿

我心懸旆正搖搖

杜牧

陳琳草奏才還在

戴叔倫

粲辭家鬢已凋

韋莊

濁水清塵難自合

白居易

高情野鶴其逍遙

張籍

登樓愈覺愁難遣

薛能

賜斷春風爲玉蕭

曹唐

十二層樓倚翠空

喬天

上清那與俗塵同

元稹

川原繚繞浮雲外

盧綸

城闕參差晚樹中

韋莊

草木盡能酬雨露

王維

山河無力爲英雄

歸仁

鶴歸華表青山

韓偓

回首殘陽雉堞紅

白居易

舊事無人可共論

韓愈

有誰傾蓋待王

孫

情多莫舉傷春目

張泌

地迴難招自古魂

韓偓

淺薄將何稱獻

納杜甫榮枯安敢問乾坤羅隱杜陵廣廈平生願嚴文燕雀心知

不敢言章未妨惆悵是清狂李商隱白日難留鬢欲蒼李昭象孤棹

自遲從蹭蹬李中大鵬須息始張翥休將世路悲多梗張泌且放

歡情入醉鄉劉兼江上有樓君莫望陸龜蒙楚天無限更斜陽聶夷中

夏云樓臺隱映接天居錢起到此煩襟已盡除李中却白雲歸洞

壑聶夷中乘將黃鶴上清虛楚萬曲闌高棟塵難到張昭水碧山青畫

不如韋莊早夏我當消暑日白居易自收靈藥讀仙書張籍吳山楚水

意何窮清江雨過閒樓看晚虹盧綸更有好風來枕簟李中別無塵土

翳虛空韓偓一江帆影殘霞外吳融千樹蟬聲落日中鄭良士能就此

中清暑否白居易卻疑身在廣寒宮胡宿漢江之水綠于苔羅隱破浪

千層陣馬來杜牧隔岸人家聚煙火馬懷素繞城山色動樓臺溫庭筠

高窗四面清風入武元衡大嘯一聲懷抱開許渾獨倚闌干飛鳥外

楊不知身世是蓬萊張樓下長江百丈清錢雲開遙見漢陽城

盧雷聲忽送千峰雨杜暑氣漸消四體輕施野霧過時千樹

黑靈怒濤衝去客魂驚劉殷勤說與雙飛燕孟如此風波不

可行李頑仙惟恐鬢成霜陸龜逃出紅塵入睡鄉李咸一枕羲

皇容我傲白居易兩丸烏兔聽渠忙太上寰中可有壺中大劉禹

塵夢那知鶴夢長曹日落高樓猶未醒王等閒何處得靈方劉

史登樓攜酌日躋攀喬身與浮雲處處閒靈江上莫帆斜捲席

方湖中西日倒銜山崔長疑好事皆虛事李山須信人間比夢

聞劉禹避暑卻來清靜域賈來游此地不知還杜相望長吟有

所思柳宗元憑高那得更無詩孫樓中飲興因明月劉禹夢裏招

魂讀楚詞劉長豈有文章驚海內杜更無書劍客天涯許年如

流水催人急羅不為愁人少住時戴叔離人六月已驚秋姚到

處消魂感舊游李後主聚散有期雲北向許往來無計水東流施

吾長卿未達終須達王勃宋玉多愁亦自愁李商隱莫訝偏吟望鄉

句蔣吉望鄉孤客倚高樓秋云萬宇千門平旦開馬懷素披風如在

九層臺趙江湖水落高樓迴許城闕秋生畫角哀李亦謂神仙

同李郭陸龜蒙永言交道契陳雷黃滔自慚未得冲虛術李斜凭闌

干首重回李山甫郡城南下接通津柳宗元風物清秋入夢頻劉兼好

鳥其鳴臨水榭顧況夕陽吟煞倚樓人章莫言白日虛華髮曹不

道紅塵老此身朱試問酒旗歌舞地李賀世情誰是舊雷陳元稹中

秋欲暮見湘煙李頻百尺樓高水接天李商隱漢口夕陽斜度鳥劉長卿

楚天煙火亂停船陳羽傷心闊別三千里韓偓屈指依稀十五年

兼劉記得故園秋正好趙嘏香鑪峰正宅門前白居易天遠樓高宋玉

悲筠溫庭青山常對卷簾時劉長卿世如逝水應長歎白居易心似孤

雲任所之

陸龜蒙

莫學魯人疑海鳥

羅邛

空教楚客詠江籬

李商隱

年

來探負黃花約

張祜

卻返漁舟計已遲

滕倪

秋來倍憶武昌魚

岑參

到南樓十載餘

戴叔倫

吟月嘲風先要減

白居易

登山臨水復何如

元

已懷湘浦招魂事

吳融

莫讀離騷失意書

劉兼

欲就麻姑買滄

海

李商隱

片雲孤鶴肯相於

劉得仁

高樓懷古更悲歌

張喬

江上秋風

長白波

白敏中

文字豈勞諸子重

許渾

飛騰無奈故人何

杜甫

滔滔逝

水隨萍梗

劉兼

擾擾車塵負薜蘿

溫庭筠

莫倚善題鸚鵡賦

嚴武

生涯

心思已蹉跎

劉長卿

華表雲深鶴夢長

戴叔倫

秋江煙景晚蒼蒼

牟融

歸鴻欲度千門雪

李頎

旅服從沾九日霜

張南史

赤葉黃花隨野岸

李

端碧樓紅樹倚斜陽

趙嘏

身轉覺三天近

李白

始與回頭向玉皇

羅

片雲孤鶴兩難留

武元衡

因向此隅建此樓

韓偓

海外徒勞尋閬苑

苑

司空圖

人間亦自有丹邱

韓翃

珠簾繡柱圍黃鵠

杜甫

金勒銀鞍控



紫騮

崔液

聞道神仙不可接

張說

騎龍卻憶上清游

沈彬

冬云水國初

冬和煖天

陸龜蒙

憑高一望總茫然

劉兼

江中白浪如銀屋

李白

樓外

青山似舊年

唐球

幾處帆檣喧夏口

李頻

萬家煙火滿晴川

韋應物

心

游目送三千里

溫庭筠

何處風光不眼前

王表

雨雪初晴望漢陽

一天寒雪下瀟湘

皇甫曾

樹園水際人煙黑

李建勳

日滿樓前江霧

黃

杜甫

今日偶攀塵外契

姚合

莫年初信夢中忙

許渾

也知得意須乘

鶴

羅隱

欲向瑤臺路渺茫

王初

利門名路兩難凭

白居易

醉向高樓醒

復登

劉寬

世事茫茫難自料

章莊

生涯擾擾竟何能

鄭谷

致身霄漢真

無策

戴倫

論道同心少有朋

于蘭

呵凍且吟冰雪句

清塞

寒山半出

白雲層

劉滄

懷古登樓更寂寥

東方虬

當年霸業已全消

羅隱

漢江水

闊吳山遠

王建

夏口城衝楚塞遙

李頻

割據一方勞戰伐

劉長卿

興亡

往事問漁樵

司空圖

可憐赤壁爭雄渡

杜牧

惟有月明吹洞簫

韋莊

臨

江高閣瞰千尋

盧藏用

積雪窗前盡日吟

許渾

落木蕭疏從上下

包何

亂帆爭疾競浮沈

李紳

風波久濤濟川楫

石貫

霄漢常懸捧日心

錢起

黃鶴樓中吹玉笛

李白

故園書絕到如今

胡曾

上樓高望往來船

白居易

雁度寒江擬雪天

賈島

零落梅花過殘臘

李頻

模糊樹色入荒煙

孫座中醉客延醒客

李商隱

鏡裏今年老去年

郭鄧

自是不歸歸便

得

崔聖

故鄉朝夕有人還

章弼

江上仙翁去不同

崔曙

人間空自造樓

臺

羅鄴

那知塵裏無窮事

劉得仁

且盡生前有限杯

杜甫

李白雖然成

異物

曹必

費禕終是負仙才

羅隱

孤吟盡日無人會

韋莊

三楚空江有

雁來

張喬

詞客如今迹尚留

劉長卿

不知經歷幾千秋

王昌齡

青山碧

水渾無恙

耿湋

去燕來鴻各自愁

李咸用

便要乘風生羽翼

高駢

更凭

飛夢到瀛洲

胡宿

神仙若見應惆悵

韋莊

此地空餘黃鶴樓

崔顥

徵君

集唐最工屑見疊出語意新奇咸豐辛亥予見其全稿於酬字

堂卷如束筍蓋不下數千首八卷其定本也永年以玉賈起家  
擁有厚貲而不暇槩其全集杜子閑谷璜與余善方欲節錄其  
佳者入釀說而七月廿九夜堂燬於火徵君著述及已刻板片  
均付焚如惜哉積一生之精力成此可傳之作而不得與磨堂  
香屑集競爽並稱著述之傳不傳洵有命也夫

余寶岡司寇詩

耐冷談卷三云諸暨余寶岡司寇嘉樹樓詩鈔可與繇津山人相  
姘秋日示李大然次韻云南國有佳人朱顏頗姣好手攜合歡  
花佩結宜男草金屋正春風佳期轉杳渺垂垂秋露零草枯花  
漸槁守貞羞自媒致身安得早君本放曠士我意亦安之忽  
然中夜起憶君感秋詩蟲聲出破屋月影窺方池雁飛尙有侶  
葉落難返枝相逢各盛年蹉跎乃至斯遲君東籬下菊香方及

時諸葛孝子題詞云古虞厚風俗山高水清駛隱處多賢人力  
行飭倫紀下江有諸葛宗卹稱孝子隱曜近百年文孫發其趾  
至德聞帝廷褒詔封泥紫用昭聖治光坊表垂鄉里事親本庸  
行無忝誰能是孝友施有政奕世濟厥美至今號義門孫曾無  
違旨肅雍傳家範積厚光應爾夙昔景前徽況復鄰邑趾願言  
書彤管摠實告青史庸按司寇名文儀以乾隆丁巳進士起家  
比部出持閩節入長爽鳩世籍暨陽嬋媽科第司寇貴後構第  
郡城蓮河橋下金剛廟西岸門施行馬甲第連薨予髫時過之  
棖棟侈剝華屋將爲山邱而門前隔河牙旗臺高數仞製極鉅  
固望猶巋然粵逆陷越室墉燬焉嘉樹樓詩鈔繫板久湮錄之  
以備補越風者採焉雨邨詩話卷二僅錄其斷句云海面文生魚  
吐墨嶺頭春煖麝行香謂極新穎然司寇佳句宜不止此

穀城詩

兩般秋雨菴隨筆

卷二

穀城詩條云李長蘅穀城口號詩云穀城

山好青如黛滕縣花開白似銀漁洋山人酷愛此二句後過穀

城不見一花因賦詩云薛北滕南屢問津遠看山色黛痕新惟

餘一事堪惆悵不見花開白似銀幾疑下句有可議矣先高祖

文莊公東阿題壁詩云東阿南望盡模糊如黛山光黯欲無我

比漁洋倍惆悵風簑雨笠穀城圖

以上全浙詩話卷四十則上六引紅亭詩話語同

一句又幾幾乎在可疑可信之間今讀先大父丙午過穀城詩

惻悵漁洋句漫猜看山穀下獨徘徊植園自是詩中畫滕縣花

偏爲我開自注云余今過穀城見四圍山色徧野白花始信前

輩詩不妄作漁洋或非其時耳遂成二十八字證之因思十四

字偶然脫口乃經三四人經二百餘年始能坐實可爲筆墨中

一段佳話也按耐冷譚卷十吳思亭參軍修吉祥居存稿中  
滕縣云小縣東風草木春客車行處見民淳到來便憶檀園句  
不見花開白似銀落句全襲漁洋似乎李詩下句真有可議豈  
思亭過滕亦非其時耶

陳句山太僕寓園詩

國朝杭郡詩輯卷七陳句山太僕寓園詩敘云故明祁世培先生  
讀書處也李自成破京師自沈於此遺命捨爲佛寺有堂曰四  
寶遺像在焉乙丑秋晚同學徒來游感歎之餘因而有作詩云  
蕭斧風高舊戟門百年遺像挹清溫春初弱柳丰儀好霜後孤  
松骨氣存此地頗多家化寺幾人能得姓成邨西岸十里時清  
汗簡扶公道一瓊寒泉弔古魂按忠惠於順治二年乙酉閏  
六月初五夜正命梅花閣下池中因南都失守杭州又降貝勒

博洛以參貂聘明臣六人忠惠與焉非以自成破京師故公家  
梅墅在寓山東北相距一里非西岸亦無十里之遙乙丑太僕  
正掌教鼐山身到此山不知敘與詩注何以有此後仲雲制府  
增訂詩輯刪去此詩

朱文正公詩

朱文正公集送冠山兄詩中云兄今首行路哭墓親祭埽長號  
我先慈不及兒達早九天有絲綸豈被九地草文正早喪太夫  
人而封公健在至甲申文正陳臬八閩始歸道山而詩語哀痛  
迺爾不肖隸籍博士之歲榮祿公旋棄養服闋省試揭曉太夫  
人先十六日歿厥後通籍 禁廷疊膺 慶典晉階一品  
榮逮幽泉而丙舍未營焚黃無所每誦文正詩失聲而慟旣傷  
孤露而學仕庸劣彌爲文正舉人矣

重赴鹿鳴

耐冷譚

卷八

山舟學士南山埽墓憇陳姓人家見壁間有康熙二

十六年丁卯科題名錄正榜僅五十名

按題名十副榜十名同下脫四字

考十二房并主司官爵表字鄉貫三場題目一一詳載解元於

潛伍涵芬第七

八名

卽查聲山先生百餘年故紙居然不毀亦

一奇也是科有錢塘周天相者中四十二三名至乾隆丁卯重

預鹿鳴學士赴宴時猶及見之因題其後云我年二十五卯歲

領鄉薦再上

溯

六十年此榜實羔雁憶余鄉賦時羣集隨諸彥

領裏鶴髮翁

謂周翁天相

巍然靈光殿風貌旣甚古章服亦不賤私

竊問姓名愛蓮分一瓣少年曾筮仕秩視諸侯半歸臥田里間

後生蔑由見恭逢盛典舉重預嘉賓宴今復卅

卅

年餘翁久隨

物變卽予同年生八九已露電乃於山人廬忽睹紙半片上鐫



千佛名一佛曾識面當年取士嚴額解纔大衍主司及同考一  
一載鄉貫字迹頗工整首尾無漫漶想見給諭賣時狼藉坊市  
徧此紙逾百年獨再優墨現賢哉方山子拾得常自玩藏度比  
吟箋裝背作畫卷某也後進人彰美在所先率書五字詩留下  
一重案迨嘉慶丁卯學士年八十四亦重預鹿鳴我等俱以是  
科後進修士相見禮尤奇之奇者庸按兩般秋雨盦隨筆卷四重  
夏鹿鳴紀事條云土人方姓懸畫一幀乃康熙二十六年丁  
卯科題名錄詩中再上作上溯鄉賦作堂謁巍作歸靈光作如  
魯解纔作僅踰大衍下有副榜一至十同考十二縣衡鑒堂中  
人字號一一繕不獨腳色詳次第具鄉貫下接字迹句而無主  
司二句給作論賢哉作異哉度比作弄等率作索皆與小茗所  
錄不同觀額僅踰大衍較宋爲嚴

李雨邨詩

雨邨詩話

卷六

載其題羅兩峰畫蒲桃云我醉渴思吞馬乳君言

此是畫蒲桃

扇

按東坡惠崇蘆雁云惠崇煙雨蘆雁坐我瀟湘

洞庭欲買扁舟歸去故人云是丹青雨邨點化蘇詩太覺刻露

汪容甫

汪容甫氏經學詞術足稱乾隆中鉅手持論偶有偏宕亦才人

恆有吾鄉章實齋氏頗訛之不能掩也詩集未槩湖海詩傳

卷三

十僅從淮海英靈集錄其

辛卯三月二十一日夜和黃仲則

七古一首蒲褐山

房詩話謂詩非所長非定論也錢金粟文苑紀事採其遺詩謂

得唐人法宮怨云高樹明河隱殿闌風簾不下夜鐙殘玉階秋

草無行迹坐對三更白露寒夜靜云空牀生夜寒夢回知漏永

過張明府云天清秋樹靜風定夜鐘遲宿龍江云疏星漁舍火

寒雨戍樓更子讀先生子孟慈太守所纂年譜中載佳作甚夥  
如丁亥年旅食云旅食和江上浮生感二毛畏讒多禮數居賤  
習憂勞野性存麋鹿機心對桔槔百年將母計未敢託名高戊  
申題機聲鐙影圖之二云嚴漏知冬盡殘春偕歲荒米鹽來日  
計鐙下幾迴腸四云夜長資火力天曉惜膏殘比似吾親苦煎  
熬漸欲乾五云裁到勝衣日長爲負米游已知貧賤累仍作別  
離愁六云日短何由愛雲飛且自望百年將母計氣盡是空囊  
七云寡鵠應悲早銜魚忽就枯可憐八九子不及城上烏八云  
衣敝猶餘線繁寒尚有膏盡人由顧復生我最劬勞字字血淚  
使人不堪卒讀先生自謂生平學問私淑亭林此種詩直入亭  
林之室矣餘如辛巳述懷云有子亦何益生受虛名累飽煖尙  
難望顯揚復何賴百世下銜恤者讀之真有不可爲人之慟甲

千秋萍云白是浮生易漂泊不因霜露怨蹉跎丙申千里云平生皎日心猶昨每到窮途愧故人寄託忠厚尤見性情至壬午重過族弟旣清云少年都似夢中看則子野聞清歌輒喚奈何矣北江詩話卷一謂汪詩如病馬振鬣時鳴不平洵確評也

王仲瞿穀城西楚霸王墓詩

瓶水齋詩集

卷十

附錄王仲瞿住穀城之明日謹以斗酒牛膏

合琵琶三十二絃侑祭於西楚霸王之墓云穀城山曉黛蒼蒼絃酌相逢拜憤王百戰三年空地利一身五體竟天亡明分天下資劉季誤讀兵書負項梁留部瓠盧全漢在英雄成敗太淒涼秦人天下楚人弓枉把頭顱送馬童天命何曾私赤帝大王失計戀江東早摧函國收圖籍何必鴻門殺沛公明縱咸陽三月火讓他妻敬說關中黃土心香一掬塵英雄兒女我沾巾生

能白板爲天子死贖烏江一美人壁裏沙蟲新子弟烹來功狗  
舊君臣戚姬脂粉虞姬血一樣君恩不庇身後道光庚子陳文  
述刻其子婦汪端選定煙霞萬古樓詩選卷一第一首起句作江  
東餘子老王郎次句作來抱琵琶哭大王三句作如我文章遭  
鬼擊四句作嗟渠身首竟天亡五作誰刪本紀翻遷史全漢作  
漢書第二首送作贈命作意私赤帝作袒劉季摧作推收圖籍  
作稱西帝明作徒第三首新作親殆仲瞿自定本故與鐵雲所  
錄之初稿異非必小韞女史潤色也壽菴廬隨筆以此三詩爲  
鄂玉農雲作曉黛作色莽酌相逢作管聲中身作生分作將漢  
作史命亦作意摧作摧我作各生能作三年死贖作一劍下一  
字作贖新亦作親一樣作同被殆玉農嗜王詩偶錄之傳者誤  
爲鄂作耳玉農又有梅花嶺云南都重鎮繫維揚搶地呼天表

數行白髮誓師餘血淚赤眉封爵誤金湯衣冠狼藉悲王導戎  
馬倉黃用李綱天子無愁臣獨恨寒濤終古咽殘陽春鐙燕子  
儘追歡一角河山整頓難誰與孤臣共肝膽天留香土葬衣冠  
風雷自護叢祠壯冰雪曾侵鐵甲寒身後文章登冊府忠魂應  
感 聖恩寬悲壯蒼涼頗有氣骨當不致生吞活剝且不去  
葛龔者王農本名聯璧文端公四世孫官江甯督捕同知以事  
革戍新畱道光辛丑從揚威將軍營王寅以誑騙欺朦濫支軍  
餉爲御史呂文節公所劾如所請行

王仲瞿落花詩

耐冷諠卷五秀水王仲瞿落花詩三首全爲自己寫照而格高韻  
遠人共謂其勝於唐六如也詩云三十韶華栩栩過殺花聲裏  
坐銷磨百年流水隨春去一代紅顏奈老何天上好風君子少

世間無福美人多西窗一種淒涼事燈火更深月照他如此飄  
零怨也遲斜陽肯照未殘時句留幾世東皇債冷落終年后土  
祠隴水人吹三弄笛孤山魂葬半墳詩寒鴉齒冷秋煙笑死若  
能香那得知年來心事更乖違說不歸時怎不歸春老肯教分  
手別山空只好背人飛風姨面冷吹紅雨月姊心香鑒白衣干  
里胡沙千里雪琵琶此曲是明妃庸按煙霞萬古樓詩選卷一所  
載止二三兩首而第二首第三句作生成一樹桃花命第五句  
笛作月第三首起韻作殘紅殺盡綠難肥誰想逢年再著緋第  
三句老作了肯作定第五六作縱教幼女拋來著敢笑文殊放  
下非第七句雪作月與小茗所錄不同豈仲瞿後定本抑汪小  
韞女史選時有所點竄耶

王文恪公

道光中江甯議和後林文忠公論戍伊犁王寅四月二十日蒲

城王文恪以死諫大斂時懷中有遺摺數千言具論和議大非

至計力保文忠涇陽張文毅乙未時官中允穆與韓城王寶珊篤

端公杰孫時官御史穆癸未門下士恫喝文恪子小厓編修抗曰此摺若上必干

聖怒無論飾終之典於君且不利焉小厓惑其言悸匿不敢上

文忠哭之以詩云纔錫元圭告禹功辛丑八月公歸遵渚詠飛

鴻休休豈屑爭他度蹇蹇俄驚失匪躬下馬有墳悲董相隻雞

無路奠橋公傷心知己千行淚灑向平沙大漠風廿載樞機贊

畫深乙酉五月充軍機大臣獨悲時事涕難禁艱屯誰是舟同濟獻替其

如矢不黔衛史遺言成永憾晉卿祈死豈初心黃扉聞道猶虛

席一鑑云亡未易任魏默深後輓詩云萬言遺疏氣嶙峋尸諫

甯徒古蠶臣薦瑗誅彌周直史排雲叫闔楚靈均風雷何日金



滕發葵藿難通

黼座陳身後被誰焚諫草觚棱月照漢宮

閨甘毀楹書已莫論黨秦誣岳又誰昆盛唐李嶠眞無子南宋  
韓琦漫有孫堂下相逢堂構痛關西並相斗山尊盡乘氣數元  
黃事休問琅邪與太原其後孫琴西撰文毅墓誌銘云或匿不  
聞所謂或者卽指文毅以爲文毅誌墓故不顯斥文毅死回難  
最烈故諱之也而近出郎潛紀聞初筆卷一乃云時軍機章京領  
班陳孚恩方黨穆相就公家滅其跡別撰遺摺又孫銘云云小  
注文毅與文恪同鄉故銘辭借爲緣起古文家原有此例則不  
攷林魏詩而妄爲之說抑知非文毅寶珊二人恫喝公子陳豈  
能就滅其跡或其時陳爲別撰遺摺遂傳聞失實耳馮景亭撰  
文恪神道碑亦諱不言

綠雪堂集

王笠舫先生綠雪堂集驚才絕艷頗視一時賦物精細雅近義  
山其尤佳者五律如放翁書巢云人語酒家鐙南樓聽雨曾聞  
雲飛似雁老樹禿于僧坐擁書千卷行銷酒六升柳姑祠畔路  
流恨到黃藤輔文侯牛將軍墓云冤哉一杯酒醜殺此將軍少  
保難爲勸高皇竟不聞議和甘養敵行毒當酬勳萬古風雲氣  
來朝主帥墳嶺南雜誌云信美非吾土胡爲久滯留談經逢啞  
虎戲墨出癡猴水惡妻孥病天低霧雨愁籬根有黃菊瑣細不  
成秋冬煖云嶺外三冬煖酣酣樂事憎蜨飛常學雪魚戲不知  
冰巷有擔花姿門無踏葉僧翻憐桃杏輩開早恐難勝卽席留  
別云木葉落湘渚煙波何太深浮雲平野合去雁遠天沈對此  
一尊酒蒼然千里心它年逢令節相憶定長吟  
訾州道中云擊汰二百里昭江接桂林人聲喧雨氣船影過巖陰白鳥忽雙下

蒼猿時一吟前邨有茅屋得酒且徐斟  
昭州錄別云桂嶺租茅屋灘江泛釣槎  
一官真似夢萬里且爲家  
匏葉休忘苦蒿心務去邪  
欣榮自有候慎勿慕唐花  
閒遣云清猿下斜照獵騎散平林  
風偃秋星動山銜遠火沈  
宵長遲漏鼓雨急亂邨砧  
欲共幽人語蕭然何處尋  
七律如後漢帝云成都破竹勢如奔  
赤帝空歸白帝魂  
一戰南陽龍有子再亾北地漢無孫  
揮戈落日三巴路流涕西風五丈原  
獨恨佞臣偏後死慣持降表走軍門  
閒遣云苔痕一雨綠閒窗雷避東風不渡江  
夢裏快游尋有味閒中佳句覓無雙  
琴書福分因貧覺羅綺心情借酒降  
裝抵半生清興在玉梅花下辦銀缸  
西湖散步云才入西泠便有煙曉妝濃  
淡各爭妍盡收畫意歸詩橐欲買春光費  
酒錢三竺幽人紅雨路六橋亭子碧波船  
林家白鶴如相識好聘梅花問水仙  
虔州

野泊云渺渺西風蘆荻洲空同雲物望中收一天殘照生鴉背  
滿目青山畫虎頭八九人煙依竹住兩三漁火雜螢流鬱孤臺  
畔清砧月重唱刀環鬢已秋漢皋逸事八首之一云一卷蠶眠  
春雪痕零脂墜粉洗銀盆美人早死翻爲壽名士相招必有魂  
顧我何心佩蘭芷憐渠到底殉椿萱青鴛剝小營齋奠未算檀  
奴是寡恩詠紫胡蝶花館云竹籬茅舍送傾城豚柵牛闌看晚  
晴小別華年成永棄大歸心事未分明月沈滄海秋無影潮打  
寒江夜有聲極目蒼茫一延蟾回看牆角短燈檠五古如蚤起  
偶作云檐月澹虛影紙窗猶未明鐙花自相語藪藪如有聲佳  
夢去未遠追之或我迎落葉打芭蕉朗然天地清雜詠云善哉  
解谿翁不錄疑雨集謂其詞訓淫青衿易惑溺隨園喜俳諧操  
戈與墨詰長蘆綜明詩次回亦選入我觀叟風懷粉黛忒塗澤

玉谿詠錦瑟何必按故實笑彼詒癡符瑣瑣加箋釋

俞國琛有風懷境

文同郭注莊義取蔡繩息日被前人瞞心緣邪思結盡芟鄭衛  
詩忽起膏肓疾七古如游山三日歌云有腳不蹋青山顛山笑  
此人端醉眠有口不吸青天月月光照人俗到骨我持一杯飛  
上山青山留連醉勿還仰頭白月跌入口酒氣從橫吐星斗醉  
復飲飲復醒酒香拂拂醺山靈青天無雲更清絕和酒作詩寫  
之石欲讀自認已無蹟但餘酒香兩三滴後之游者怪且顛咄  
哉此山生酒泉錢舜舉華清出浴圖云君王新納壽王妃五家  
第宅皆光輝金珠照耀萬花谷天下不肥妃子肥懷昔華清初  
賜浴水滑凝脂看不足後宮粉黛盡無顏略許三姨鬥娥綠一  
朶嬌紅旋欲酥藥闌煙重不勝扶沈香亭北何人見偷寫淩波  
飛燕圖漁陽鞞鼓秋風起斷送朱顏黃土裏可憐三尺薄蛟綃

昔日承恩今賜死山川滿目淚霑衣金鏡千秋照已遲遙知劍閣聞鈴夜瘦過韓休作相時佳句五言如淨慈訪小顛僧云水蓮花影白山入磬聲青除夕云禽聲寒在樹井氣煖于雲秋暮維興云日暮蟬停唱天寒螳罷兵步月云鷺立一池雪蟲吟滿地霜幽栖云人煙春樹外花氣午庭中游雲泉山館云亂雲山湧翠深雨麥垂芒樹老將欹棟雲晴欲去樓一房惟竹石萬壑自笙鐘雲氣通林白嵐光擁座青嶺南雜誌云翠鴉盤茉莉紫鳳啄檳榔皿蟲三月雨鳩鳥一房煙金銀隨市氣草木得人妖黎人登獸貢蠶女獻魚租江邨卽景云星動魚沈笱潮平鷺畫沙過壽佛菴云堂空疑佛定花好累人看舟中云篷疏聽雨細風緊偏鐙斜舟中雜興云暝猿癡點半妖鳥笑嘯兼雲藏嚴箐密風挾浪花驕旅館雜詠云蜜香蜂上課花落蟻行軍湖上卽

席云湖光初拭雨花影欲扶人嵐光生戶靜花影補廊虛雜詩  
云讀史能蠲忿談詩不諱窮嬌陽卷新葉宿潤醒殘花劉仙巖  
云山空四時靜日午一鐘鳴偶成云山近雲生早官清客過稀  
卽事云蟲絲映空一花影落池雙舒卷蕉天大從橫筍地寬感  
舊云往事存歌哭空山閱醉醒七言如草堂云一家都在綠陰  
裏十日不離花影前擬微之以州宅誇樂天云白蘋風細人沽  
酒紅藕花深女弄船秋晚云葉赤霞烘千樹火山青日埽一峰  
煙岳王墓云天下二分乾叔姪將軍一眼小江山秦始皇云萬  
世帝王僂朕始九州郡縣削侯初遣病云處處醫皆盲郭璞時  
時身作睡嵇康問遣云藥真轉畏庸醫試書誤思尋別本刊放  
懷云我輩才名將福換累朝詩境仗人開喜弟旋自龍川云一  
櫂蒼葭歸小陸滿城黃葉下重陽七夕云要憑世上星辰手重

繪天邊耕織圖悼亡友云曾有煙霞名早澹老無邊幅性愈真  
偶成云香篆曲從風細處樹陰圓在日中時蛙爲草深矜鼓吹  
蟻緣花落起樓臺寄家人云情比夜長那得夢體緣春瘦不關  
詩澤國春陰佳日少名場清福冷官多花氣暗蒸三月雪窗光  
晴漾一湖雲讀雪舫秦淮行卷云蘭葉風催三月渡桃花水帶  
六朝香秦淮云落日青苔脩竹路小樓紅雨賣花天桐廬卽景  
云滿城風雨催佳節一路江山看美人梅關云時清古戍堆黃  
葉巖老幽僧化白猿卽事云漸諳世態宜青眼纔動名心已白  
頭新建學海堂題詞云劍氣朝騰陽谷暈珠光夜湧赤城霞  
應預識陳丞相花亦爭迎宋廣平夜靜二龍司寶笈秋高一鶴  
下丹梯詩從鮑謝唐風啟文到歐蘇制藝興贈某君云願君細  
掃阿房蠶愧我空雕爾雅蟲謝前輩某贈菊云老圃人如周柱



史殘年花亦魯靈光昭州紀事云廢寺有鐘沈暮雨亂灘如鼓  
戰秋雲喜內子至云久別頻傳卿念遠相逢忽似我還家寄家  
人云與月樂天花樂地將詩驚鬼酒驚人家宴云妻因量淺頻  
辭爵兒爲題難請改闕賀友遷任云楊柳風輕齊按轡桃花漲  
滿好乘船山齋云晚日映山濃寫照午風吹案暖翻書澹坐云  
十年豆蔻他鄉夢一片蘼蕪故國心晚眺遣興云入洞雲多深  
樹暝看山人老夕陽愁僧歸別寺鐘初響雲過前峰樹忽陰大  
裕云似爾應稱無患樹多生甘作不材樗送友之襄陽云桃葉  
煙波雙槳碧梨花春酒一衿青毛女衣留秦代月孝廉船載洞  
庭春萍泊生涯人瘦早桂花時節酒醒難詠禰衡云鸚鵡憑空  
折羽翰江濤猶作鼓聲酸阿瞞巧避山膏罵黃祖愚供黍臠搏  
年少疏狂招禍易老成輕率薦才難東京細讀儒林傳通德門

高福盛寬

笠翁先生詩稿最繁見輒爲人攜去不自愛惜畫幀扇頭題詠  
尤夥遺集所收未盡如繆艮文章游戲初編有丹蘿吟館記四  
編有弔夢文曝書賦生地獄賦殆以游戲之作故棄之又有書  
袁大安校書團扇七絕句迴文七絕三首亦猶是也予家舊藏  
先生詩箋最多辛酉亂後無一存者惜當時未錄別紙不能爲  
先生刊集外詩也近長巷宋敬菴藏有爲鳳亭八先生題春風  
畫冊云珠簾壁月夢游仙腸斷春風燕子箋曾記小窗紅燭夜  
滿身花影上琴絃倚闌一面酒旗風人醉琵琶別苑東花外晚  
煙花上露新歌唱到小桃紅一枝相倚淡妝妍要乞檀郎錦繡  
篇不會吟詩郎自作自磨香墨到郎前風光細膩落庭陰繡口  
春深寄豔心和韻少遲君莫怪近來佳句愛微吟無端消息隔

層城空有羅敷未嫁情紅粉青衫同一例誤人兩字是聰明

綠雪堂詩誤

綠雪堂遺集卷四鄆城旅舍客出心餘先生詩扇見示並乞背題云我生之歲少微隕迄今三十有四年此扇標題自辛卯倏忽卅載馳雲煙按笠舫生於乾隆丙申詩云三十有四年則當在嘉慶庚午心餘先生卒於乙巳二月二十四日述菴誌銘北江碑文皆同乙巳距丙申十年首句誤也

林阜閒集

潘少白語林阜閒集取晉書卷四十九阮籍傳附從子脩與兄弟同志常自得於林阜之閒語集中萬里游詩一千一百六十四韻一萬一千六百四十字原本一千四百韻後刪去二百三十六韻篇幅之冗長爲古今詩人所未有

瘦吟廬詩

瘦吟廬詩鈔四卷山陰沈竹堂

煒

著

詩集已祀補列  
條作會稽誤

竹堂歲貢

生道光辛卯卒年七十八卷端有莫階馬志燮余雲章

大輝

馮

珠帆

春潮

四序似皆應付之作春菴其甥也題俞曉峰鑑湖春

釣小景云解組歸來又理綸柳西亭下草如茵鰕魚細聚萍苗  
短不礙斜陽打漿人首夏邨居云解將筍籜龍孫長飛到楊花  
燕子忙仲秋小齋自遣云怕看明鏡驚秋老喜把深杯待月圓  
落花云起看市地紅如許想到辭枝淚更多立冬前一日云衰  
草備蟄寒過我短籬殘菊瘦于人仲春遣興云五里看山猶蠟  
屐一樓得月偶調絃淡境云從來風月能涵性未有神仙不讀  
書頗有劍南筆意五七古多率語居張墅白魚潭

瘦吟有哭平東序親家二律云錦札方頌墨未乾俄驚絕筆覆

翻看誼同兄弟相睽速路異人天欲見難望斷白雲千古杳痛

深黃口一丁單

公於去年八月始舉一子

掌珠頓棄行何忍禁得漣而風雨

酸品望文章異眾流感深不遇獨悲秋名駒未控黃金勒

君學

終於一稔吳殿撰其弟子

雛鳳先翔白玉樓

令長君山陰諸生中銓銓者十載前逝而無弱息

君有

德音堪自立我於肺腑向誰投夕陽古道行人近痛讀遺編挽

去駒東序子族曾祖諱正令長君謂德莊族祖諱標宗譜云娶

童氏庠生巽女親家不知何指族祖卒於乙亥六月族曾祖卒

於乙酉四月與詩注合而此詩編於癸未年殆誤云去年八月

始生一子指東序公側室所生步蟾族祖後年三十餘卒族祖

竟無後哀哉殿撰未知爲棟華廉訪諸人學士淪菊中丞俟攷

瘦吟又有和任午莊先生韻一律在戊子年蓋先師館魯墟

蕭兼泉茂才家事又有花朝前五日東任午莊先生七律在庚

寅年又有讀任午莊懷化集評佩芳女史詩跋後二絕佩芳兼  
泉室時亦問字 師門懷化集似 先師集名後以少作弃之  
故余輩皆未得讀此事秋田更未及知故錄之

持雅堂詩集

尙瑤湖自刪詩稿有作自謂學太白東坡藏園劉松嵐序其集  
則以爲忠雅香蘇之後起其詩具在骨力風神不逮二家遠甚  
五古惟開卷湖口曉發第一首爲合作卷三貞婦行卷四悲大疫二  
篇亦可誦七古略得藏園氣勢題友人痿馬圖一篇最佳紛紛  
韓幹工畫肉外縱豪強中軟俗但把皮毛炫世人誰知痿馬神  
完足得其精意遺驥黃此手前身眞九方鐵網珊瑚迸光怪龍  
鱗遽立森鋒鋌銅筋石肋得天厚鍊以冰雪尤堅剛皮毛脫盡  
眞寶出粗穢除卻精氣藏漫言痿骨似薪積一蹴能使風雲忙

杜陵老翁失官職見人哀訴殊減色形雖彫敝德純全俊物終  
能空冀北圖茲瘞馬君何心異形不用還方尋千金市骨果如  
古一例舉肥宜薄今從來相馬失之瘞指爲鹿者何足詬草綠  
湖南萬里行棧中休戀三升豆羅剎磯弔黃侍中云君赴火中  
臣赴水千秋太山同一死羅剎磯前江水寬怒濤十丈掀天起  
夫赴江中妻赴淮江淮兩地心相偕潔身更有二賢女玉樹挺  
挺悲生埋吁嗟乎募兵縱效包胥哭國門甫出神京覆誰爲溫  
嶠同勤王不死祇隨齊秦戮君不見夫人血影常留石石磯豈  
復有時泐諸臣抗罵族株連何似全家先殉國斷句如六朝歌  
云卻恨高公入建業不誅此輩誅青娥蘆花曲云漫添別恨凋  
朱顏豈有佳人能白首藏園歌云孔融魯國奇男子肯向權門  
索知己謫仙自有明皇知每望西江歎名士謁岳王墓云虎縛

東窗始安枕敵兵究未因和寢直待謠成白雁來始悔軍未黃  
龍飲于忠肅公墓云忠臣一身何足惜血入黃泉應化碧但令  
宗社兩朝安不必臣心萬人白嘉定弔錢竹汀先生云南宋詩  
文等自鄮攷證經籍前朝無王洪馬魏各精博俗人但愛漁仲  
書我朝通儒接岷起鼎立尤推閻顧朱西河毛氏騁雄辨多病  
只類升菴徒先生曾羅廿八宿爭暉紀戴兼江盧仕宦不踰六  
百石歸田獨抱羣書娛泛海珠船每勅獲皆言豕與遠東殊史  
家攷異更精絕子元相對形粗疏同時七子競奇秀二王猶覺  
難齊驅繁城受禪臺云轉瞬陳留受欺罔天道報施原不爽但  
恨奸人得考終漸臺死不同新莽五律如樊城旅感云離鄉二  
千里今又困樊城出險波纔遠還家夢尙驚市喧車馬貴風埽  
雪霜清記得中州路天圍一掌平不是宦游人天涯別老親縱



教書易達當亦序更春歸養知何日登高愧此身艱危皆自取  
未敢怨風塵送左麗生歸粵西云天意寒如此嗟君反桂林冰  
堅馬蹏碎霜重雁聲沈曾面原非遠論交漸覺深登堂母兄失  
哀感恐難禁斷句如夜游云蠻煙鎖江黑鬼火出林青游如松  
庵云閒階落山翠破壁透江光過無錫云遠峰含雨氣孤島變  
秋聲與內余紅藥別云病緣家難重貧恥俗人知長大夫墓云  
至人欣訪樂俗論咎遠天七律頗多合作不悉載斷句如去長  
沙云惟應賈誼遙憐我始信靈均欲卜居聞漁洋後裔式微云  
誰將斐豹丹書焚曾使華泉後裔安百花洲云花枝得地春常  
好磴道盤空石不頑平原君云賢士三年方脫穎美人一笑便  
無頭一事猶堪買絲繡勢窮終不棄交游懷江漢友人云不才  
恐作無名死久別應憐太瘦生登吳城望湖亭云漲浮彭蠡疑

無岸雲擁匡廬別有天史閣部墓云舊人難識王琳首異代猶  
修卜壺墳遺興云薄游徒似東方朔歸養多慚北郭騷懷杜閣  
云誰教廣廈成虛願應悔長錢託壯游姑蘇懷古云金屋未妨  
藏越女石田何必獲齊人路王云微子又看朝玉馬明湖那許  
化金牛虎邱云鶯啼十里春無主雲聚三更月易昏莫春云開  
卷又彈千載泪看花怕到十分春滕王閣試第一紀事云豈有  
才凌閭伯嶼竟同詩愛呂居仁書漢武帝紀後云兵威遠雪平  
城恥蠱氣潛生太子宮牧豕豈勝卿相職射蛟偏見帝王才瑤  
臺此日盈山海贏得初明拜表來上周耿堂師云家事肩從貧  
裡久悔心萌到枕邊遲彭躬菴文集云殘稿偶留奇氣在俗儒  
或議霸才粗悼亡云痛深祇覺言難盡病久猶疑死是虛病深  
猶恐修容拙緣斷那堪話別哀啖荔云自古男兒側生好妻梅

深悔作林逋海陽旅感云讀書已誤師前輩抱病猶思見替人  
珠江放舟云姑聲在耳山谷暗蜃氣成樓海霧深生日述懷云  
獨師懷抱難諧俗偶學逢迎亦聞機耦耕云耦耕湖上冷難禁  
俯首權門乞賞音縱使文章過北地已無面目見東林田疇況  
賣盧龍塞孟達翻爲上堵吟泉下相逢臨桂伯不應師弟更同  
心適吳城云未妨冬盡窮難送但得江平夢亦安汜水弔竇建  
德云十萬貔貅救洛陽三分鼎立恐脣亡揮戈能討江都賊鳴  
鼓宜開上黨疆鴈首賜秦天已醉虎牢偪鄭敵逾強臨流一擲  
身爲虜徒使游人弔戰場洛陽懷古云誰使董公稱健者始知  
徐孺是高賢銅人辭漢垂清淚不待摩挲五百年但知鐵鎖燒  
江底豈料銅駝臥棘中登許州城云紅蕖繞郭香無際綠樹當  
門暑亦寒東謙谷刺史云三國霸才從古少兩京名宦此州多

擬王谿云霜裏豈知寒獨忍尊前轉覺笑無多寄答伯兄云優劣不須論汝穎英雄從古笑曹劉雪夜懷劉松嵐云恨無孤櫂尋安道應有長裘覆洛陽夜氣肯隨燈影亂冬心久抱雪花香寄阮新野云局外那知游宦苦閒來卻耐著書窮七絕如灋水懷古云灋沅一帶傷心碧不爲靈均爲楚懷表忠觀云當年陌上花如海何似空庭桂樹香阻闕云今朝幸得湖神助卻向關前守順風慧山懷古云逃荆漫說尋靈藥自愛青山佳處行游煙水亭云不道湖中別有天方壺海上徙何年廬山萬疊青於染飛入孤亭併化煙讀唐書云夏長春生獨少冬霜華不及露華濃漫云上界仙官足僞告紛紛鬪李寶蓼花云大葉粗枝不畏風豔分水國立庭中年來閱徧繁華色只有秋花耐久紅五排則綺語品詩示友二首隊仗整齊頗近竹垞

宮帚集

陵川楊繹堂觀察

聚成

字立之道光辛巳舉人十上春官不中

第甲辰大挑一等以知縣發江西丙午署安義丁未秋代還補  
龍南戊申春任庚戌以獲盜保舉御事咸豐壬子春署贛縣十  
月升甯都州未任癸丑署觀音閣通判甲寅任甯都乙卯春署  
贛州府丙辰髮逆圍城以印印祖衣登陴守禦凡十月始解奏  
保知府花翎庚申春解任同治壬戌四月署南安癸亥四月卸  
任補知府後以道員用十月四日猝於贛年六十八甲子長子  
尊三大令長達刻宮帚集四卷分忘憂舟中南游歸舟循陔集  
夢燕游臥雲霞章餘生十草  
何學使地山敘謂才情格調與溫李楊范國朝沈宋沈似指  
歸思宋  
豈荔爲近按觀察三任劇邑聽斷如神械鬥搶劫擒渠嚴治之  
守贛最有名詩則五七古頗未合法五律最佳七律學誠齋少

完善者茲採其讀東坡集云汝南孟博人中傑攬轡澄清世不  
容公自早年深景慕誰知他日比遭逢命宮展轉居磨蝎詩獄  
深文到螫龍靜揀醫方閒說鬼老來豪氣借銷鎔搗衣曲云衣  
綻妾縫衣浣妾搗搗衣衣不知衣上淚多少妾若籠中雞郎如  
沙磧雁雁入網羅雞鳴奈何立秋云又聽秋蟬第一聲西風送  
爽入山城鄉心不似梧桐葉偏傍閒階落處生閱昔人詠古詩  
云幸蜀無煩怨太真刻誡王魏不忠臣詩家最喜翻成案責備  
賢人恕美人舟中不寐云蘆篷霜打泊寒波水涸灘高奈遠河  
日夜谿聲搖枕起可能流夢過黃河反游仙云秦時喜任關門  
尹周室畀分柱史班仙籍最崇官最小九霄何必勝人閒渡漳  
河云小橋束水不生波凍霧如雲帖岸多鐙影微紅鈴語碎羸  
車賦夢過漳河斷句如人煙生野渡魚影下寒谿風催千舶迅

雲界半湖陰。跋屨奔敗檻。凍雀啄殘陽。橋冰橫遠色。隄雪束寒  
波。茶瓶煎夢碎。戍鼓偪詩成。殘秋流水去。落葉故山多。暮雲催  
客去。秋月照人多。山廚香煮粥。邨釀薄成醢。泉聲流夢遠。山翠  
上衣多。松陰青到地。雲氣白當門。離愁和夢亂。病骨怯春寒。七  
言如詠仙。云切重帝王。空採藥時來。雞犬忽升天。肝腸欲訴  
琴。終澀面目無情鏡。亦憎秋鎧云。寒更說鬼時。如豆遠道懷人  
夜。卜花荒邨近市茅。爲屋遠岸疑城樹。起樓逢醫便作神仙  
試。到此方知父母難。閨中云中歲蛾眉。羞作婦。幾人燕領定封  
侯。邯鄲道中云。雲山傲岸難爲侶。花柳粗疏易得春。大道斜風  
塵沒馬。荒城殘照埃如人。過圓津菴云。窮途知己公能報。方外  
憐才世更難。宿雨綠添栖隴麥。曉雲紅襯出牆花。絮被云。賴  
爾安閒尋好夢。關人冷暖在深宵。山靜偏聞吟樹響。心閒偶

爲看雲忙庸棋苦打輸殘劫疑竇多生讀慣書弟達夫

升元入

學云九原耿耿心應慰百感茫茫淚轉多 世境勘空全是夢

好山見慣不知名平臺落日留人影曠野秋風起雁聲往事都

隨流水逝閒愁眞比亂山多寒樵云林繁憶爾揮斤入薪貴愁

人當桂燒寒漁云可憐風雪寒如許偏向煙波寄此身 矮几

有書從客借石田無雨替農愁春愁如草吹都活客路逢花看

易驚蘆花墜水如晴雪樓葉搖風易夕陽橫櫂客聞呼渡急憑

車人爲看山忙詩興近來隨宦減客愁從古入秋多人愁老病

如枯樹天釀秋陰爲桂花諸聯皆清思新句脫手彈丸詩雖未

足名家在西江守令中與王窗山馮子良差堪伯仲宜二人外

無倡和也集爲達夫手校冠以行略後有跋別有文集律賦四

卷五言排律四卷未梓同治戊辰大令贈以索序予以古人書



不兩序且時方守藩官事机阻有去志遂不作

宗滌樓觀察詩

躬恥堂詩鈔後編

卷六

有乙丑次沈拙安丈喜金陵克復十一月

補行秋試八首云厄運初平泰運開詞臣持節渡江來盪除蛙

紫氛煙淨腹見文昌最上臺鬱抱同舒蹙難中羣才吐氣作長

虹要從雪海冰天裏下筆春回卅六宮重開選佛清涼地新拓

賓王講議筵又遇山陰平太史鶴聲復振蔚藍天

自注寬夫先生曾主江南

試東南嘉穀乍登場藝圃書疇底事忙鏡吹聲餘笙雅作駕麟

騎鹿喜超驤天上將軍靖萬魔雲中星斗燦陀羅上元閒氣于

斯盛定取名臣碩彥多士安排入廟廊廣寒方發蕊珠香桂

林本有冬榮性宜展仙蟾白玉堂開徧羣侯旌節花嶺頭花更

放橫斜元戎校士龍門壯收取奇才數百家如此江山入源洞

頓從黍谷動葭灰英靈空際皆含笑不獨歲寒松竹梅按是科  
得士二百七十三人雖不及嘉慶戊午先司農公甄拔得人然  
亦頗有知名之士榜首江南春璧爲鄭堂先生從孫十上棘闈  
不售拆封填榜嘖嘖歎老名士者胥吏僣從百數人如出一口  
湘鄉相侯奮髯抵几大笑不置詩中所云桂林以試帖題爲桂  
樹冬榮元戎校士以監臨爲合肥李肅毅伯也

志隱齋詩

王窗山大令

文瑋

志隱齋詩鈔卷一有狀元衡弔余忠宣公詩中

云公蒙

聖朝謚忠宣

庸

按勝朝殉節諸臣錄余煌通謚忠

節忠宣乃瞿式耜專謚豈窗山偶記余廷心謚爲余武貞謚耶  
監國紹興一載荒朝槍攘兵潰而大僚無以城守殉節者死止  
大司馬一人足爲蠶城生色何以監國航海於從亾之孫忠襄

錢忠介馬忠宣皆曾賜諡而公獨無之豈中土睽隔島上無爲  
疏請者抑忠宣卽其舊諡後人諱而不言窗山誤爲乾隆中加  
耶

漚寄生五古

錫廷又藏有漚寄生戲稿五古一紙行書甚瘦勁云人生無百  
年所苦爲形役容顏甘一經晝夜常頽頽先生靜者儔涉世戒  
褊迫扶老方出游志眉乃中射幾碎武相顧猝遇胡僧擱邁此  
无妄災株木困行客血流盡泔泔言笑自啞啞藏身宜書巢失  
足悔城陌剝膚能泰然幸不臥牀簀痛定益思痛靜鎮特其迹  
示我整以暇新詩構一夕探驪早得珠頽下光絢赫絕無呻吟  
語允許文章伯大過非滅頂小毒任噬脂罷點漢宮黃尙閃南  
山白未須結以綬何妨束之帛抗顏聊爲師譚經屢奪席顰頭

彼何人鼻涕長一尺口脂與面藥往往乞恩澤梅花學新妝  
隨詫奇策我性不嫉媚與君合淪謫濁酒時中之一飲杯千百  
掉頭乃巢父囚首亦安石求瘥兼索垢何損復何益逖出幸无  
咎時過良可惜請迴頻蹙容更躡游山屐矍鑠羨此翁漆點方  
腫碧下有雙螭鑑陽文方章一激夫陽文方章一鑑其名激夫  
字也不知何姓漚寄生乃其別號詩蓋和友人傷額之作故曰  
戲稿

### 柯亭子詩

周文之太守沐潤柯亭子詩集典瞻奇麗於近人中極似頤道  
綠雪兩家茲錄其近體數聯五言如渡江云寒潮爭落日暮角  
壯瓜州臨江閣云孤閣兼天涌羣山墜地豪步月云天卑平野  
受月正眾星降卽景云古渡鐘聲暝荒城雪意深石瘞能摹鬼

樓高不受春雪意農家飯鐘聲佛國雷彭城云羣山昏雨氣落  
日壯河聲小樓卽事云客心爭去鳥花事健深杯買佩刀云光  
衝牛斗直影偃雁門高安邊無將略誤國有儒冠待時觀變化  
得酒起縱橫七律如早梅云鋤來明月初三夜開作春風第一  
花寄族兄雨香秀才云酒國擊鯨酣夜月詞鋒摧虎走春雷登  
雲臺山和雲汀宮保韻云雲起九疑天下雨河流三島地中雷  
盤門晚眺云白日銜山沈馬碭黑雲捲海上龍橋讀畫云快疑  
風雨探喉到化作煙雲入腹寬品茗云莫苦口爭思諫士能蘇  
肺病憶佳人喜雨云天心特地醺農苦人語如雷說歲豐讀書  
有感云登科路淺儒風敝讀史人稀吏道難嬾才詩贈許夢西  
云宰相頭銜煨芋英雄心迹采山芝嬾趣云閒雲滿地無人  
掃好月當天有夢游嬾功云花月精神詩卷裏湖山勲業釣絲

中送春云絲雨塵花狂滿屋雛晴寵柳綠搖門白桃花云柳絮  
未飛春去後梨花同夢月明中燒殘銀燭春無影吹徹瓊簫月  
也愁官柳綠時偏淡宕女牆紅處愈分明飛來天上嬋娟月銷  
盡江南兒女魂寒依疏竹蕭蕭影淡寫空潭漠漠春儻逢崔護  
非青眼重遇劉晨已白頭白雲爛漫天涯路難判仙凡是此花  
園居春興云水平弱檻渾無力花傍疏籬便有情春雨云四野  
黑垂雲氣立五湖紅入電光飛感懷云不受人憐眞俠骨能遭  
鬼妒豈凡材燕子磯云六朝山色渾如夢萬里江聲欲變秋和  
友人春興云牛笛橫腰寒食煖鷄銓蕩月綠陰圓京口云風驅  
怒舶山無色月墮荒江鬼有聲卽席和徐稼生典試云銀河斜  
卷珠簾色碧海橫接鐵網材七絕如湖隄云攔隄春水嫩搖天  
倒影山光欲化煙忽聽鶯啼不知處兩行垂柳一漁船皆窮力

追新無一語拾前人牙慧至如秦淮泛舟云天光落鏡水流煙  
不辨誰家鬧管絃買得石城飛艇子一枝柔櫓劃波圓則王文  
簡過梁谿詩買得蜻蜓小如葉推篷看殺九龍山雖點化嫌有  
迹也兩浙輶軒續錄采其弟星譽星譽詩獨不收隻字何耶

孔有函太僕詩

曲阜孔有函太僕

繼錄

于南詩錄二卷心嚮往齋詩集之一也

凡三百二十七篇蓋咸豐甲寅秋游浙所作如江上述秋八首  
之六云阜雕風急海雲低于役江皋望眼迷離亂難爲林下逸  
悲歌來共草閒啼窮鄉婦子仍阡陌盛世河山暫鼓鼙起舞看  
天還伏枕夜中何事更荒雞河橋風水咽蕭蕭軍帳連雲檠戟  
遙漢室功名期耿鄧江天圖畫改金焦茗臺棋墅垂楊郭蘭漿  
珠樓碧玉簫昔我狂游人不識早從綺夢醒寒潮元戎帷幄杳

難知兩載軍儲等漏卮。羈帳貔貅皆北語。野田烏鵲少南枝。爭傳霸上渾如戲。枉認陰符倍用師。高枕兜鍪看山色。一時閒殺羽林兒。皇輿列郡古昇州。阻絕荆襄在上頭。頓使地中生鼓角。可堪江左哭風流。樓幽紅粉黃金贖。巷冷烏衣白燕愁。閒說廉頗猶健飯。未應李廣倦封侯。朱方笳吹劫餘灰。旁郡曾驅義旅來。募卒苦多無賴子。整軍當用有餘才。珠江戰艇黃雲合。京峴嘯烏白日哀。招隱南郊山寺好。如今避地幾蒿萊。江城樹羽颺西風。楚尾吳頭落照中。海內孤斟從醉醒。天邊一劍有雌雄。雲翻雨覆看流水。歌短吟長對遠空。道路谿田秋尚淺。旅人飄泊祝年豐。悲秋四首云。一枕愁迴江上鐘。更端萬感涕何從。山郵飛檄罷官騎。水縣徵糧急夜舂。郡國兒童多尙武。耆耄歲月失歸農。遙遙戰伐煩諸將。惴惴機鈞出九重。崩潰旣往復何



云晨起看天到夕曛河鼓作芒爭白日鬼車如訴隱寒雲大田  
螟螣紛遺孽黃閣麒麟待策勳莫怪一竿泣魚父分明四境屬  
將軍肝膽淒涼鬢髮霜餘生耳目轉茫茫金隄雪浪黃河徙玉  
粒雲帆碧海長緩急一時通國用吁嗟萬姓忍私藏海鄉差慰  
天人意縣道秋成有稻梁朝廷用賞寬於罰節鉞憂危亦可憐  
王曾來同仍萬國鬼方垂克已三年銀罌翠管頻霄漢楓葉蘆  
花自羽絃草野狂愚迷出處九迴腸斷越江邊歸舟雜感十二  
首云萬方垂耀紫宸霞山海車書自一家絕傲風沙生鬼域中  
天歲月有龍蛇羽旗樹隴隄編甲玉帳連圻帥建牙草木變衰  
歸計晚江頭老淚滴清笳誰使弦高速寇來廣陵城邑又蕪萊  
黃灣月色重湖冷瓜渚濤聲萬木哀代馬乘秋軍帳合吳山銜  
日估帆開一隅捍蔽能耕鑿辛苦防危節鉞才嚴疆作鎮南徐

重治世屯兵北府閱水柳烏篷京口驛春風黃鳥戴公山三年  
組甲煩熊騎一角煙蘿擁觸蠻夷難江城猶未復幾時山黛展  
愁囊王氣燕山甸服遙軍聲暫駐海門潮金甌化日開三楚鐵  
鎖愁雲歛六朝宿衛老成憑向寵偏裨特出有張遼一時戍笛  
鑿江上悽斷秦淮月底簫中原滋蔓走豺狼萬里天威自朔方  
白騎黃巾通渤海烽煙亭障起漁陽控弦虎旅三河士仗鉞烏  
桓異姓王那許潢池兵久弄捷書勞盼漢明光高唐市歲尙橫  
戈專閫聲威近若何鄧艾人傳騎兩蜀莫敖自用小諸羅蒼茫  
古月漁邱嶺歷亂青燐馬頰河爲問縣駒今在否風煙號泣不  
聞歌州開南豫風侵古寇致尋陽禍有胎八郡連營新壁壘六  
師行省舊江淮萑苻剪伐街懸首舒蓼流離爨析骸聞說元戎  
近乘勝昌黎碑版待磨厓荆襄千里幕嘯烏道路初平草木蘇

山市人煙漢陽渡戈船饒吹洞庭湖潰師李聽瘕良史代將隨  
何不腐儒皖水東偏方告警援軍早晚下洪都滬瀆勞師臥虎  
貔踟躕斧鉞待鯨鯢笙歌井邑環兵戍樓閣煙波雜島夷四海  
沙蟲天煦育三吳風鶴歲憂疑征人黃浦江頭宿照水蚩尤未  
偃旗天時人事未蕭條征伐詠求偶 聖朝血淚輸供歡士

馬津梁酤榷到漁樵生逢

帝德真堯舜言秉周官望賈晁

草莽孤臣同綴羽東南烏雀正飄搖山瘴不類鳳麟姿下土羞  
蒙國士知賸有莊周蒿目歎虛過江總黑頭時寒蜚煙草迷晴  
阪沙鴝風蘆失晚枝悲極狂思生羽翼干戈滿地客安之官柳  
空條委陌塵煙皋淒冷似殘春有家等是無歸處將母難爲未  
死人苦霧待天開白日康衢隨地翦荆榛傷懷漫作蘆中歎鐘  
鼎旂常自有人諸作導源少陵諸將直書時事激切悲涼而督

師之縮朒抽釐之繁瑣尤不惜痛哭言之斷句如了橋野望云  
野渡片雲同客懶荒籬一瓠綰秋多程迴古驛慚籌筆天遠圍  
城亦枕戈吳門別伯平云不是苦心誰識我可憐無地著斯人  
莫歎浮生空識字幾人抵死覓封侯皆可誦也太僕爲潘四農  
門人工詩能書學李北海極肖通武事登山如飛鳥抱用世才  
浮沈水部辛丑冬轉調河工均溫無所試癸丑入雷以誠營同  
楊蕉隱籌捐宜興保候補府厥後從軍浦口戊午八月師潰陣  
亡未覓貂鍔竟畏馬革贈太僕寺卿長子廣稷字海安號改菴  
成蓉銘門人從戎左恪靖西征花翎候選知府次廣牧字力堂  
廕監生候選縣丞王甘巖壻也遂於經學兼通中西算術甲子  
卒著孔子生卒年月攷一卷已刊行禮記天算釋一卷刻入陽  
湖惲菴耘觀察祖彝叢書中又入廣雅書局 皇清經解續

編子昭案號印川光緒己卯舉人己丑進士卽用山東隨辦黃  
河隄工辛卯三月十四日於長清縣楊莊河隄陷落水隕命妻  
劉氏壽曾妹聞信絕食自盡廿六日奉  
旨從優議卹劉氏

賜旌年三十四祖孫皆以死殉事可哀也夫

### 賡綬堂詩

賡綬堂詩集四卷矢音集二卷晉甯何賡卿少司農作司農五  
七古學杜辛亥使蜀諸作頗多可存五古如過豫讓橋由畫眉  
關達襄城五丁關韓侯嶺弔淮陰侯倚氏縣自三岔驛經新紅  
峽至南星鎮七古如老鷹巖天女城曉由臨汾趨襄陵鳳嶺赤  
崖巴蔓子墓聞人話鄉里事五律尤清潔可誦如喜金門六弟  
至三首云已後春風至還先朔鴈來烽煙過楚澤雨雪到燕臺

驟喜身能在翻疑夢未迴  
鎧花真有信含笑昨宵開  
十二年中別八千里外逢  
暫來清禁宿同聽上林鐘  
乍見翻無語相看未改容  
新篳方出甕聊共一澆胃  
翦燭西窗下今宵樂有餘  
傳來堂上語附得里中書  
游迹君方始歸期我久虛  
好堅秋後約與子共膏車  
斷句如留壩道中云雲沈  
巖樹色雨入野泉聲題留  
侯廟云山色仍秦漢泉聲  
自古今渡河云澹雲將雨  
去高浪引船迴雨夜宿金  
勝寺云窺燈饑鼠出入戶  
暗螢飛犍爲夜歸舟中云  
野煙如水白夜火雜星明  
合江曉望云江聲撼危堞  
山色墜孤篷感懷云雨氣  
朝吞樹江聲夜入城七律  
如梅花十歲時作云此是將來調鼎材  
百花頰首讓先開冰霜性質  
曾經鍊鐵石肝腸那易迴  
自與天心相往復何須地  
力爲栽培平生清潔誰能  
比不著人閒一點埃斷句  
如冬日入直云冰棱戴石  
妨穿履風

力驅沙猛掣裘贈蕭質齋學博云碧雲天遠勞歸夢黃葉風多  
易早寒並蒂菊云偕隱誰爭三徑地雙栖祇借一枝秋劇憐兩  
意相遭淡難得同心似此幽華清宮云慣閱興亡惟此水自耽  
安樂不由山石門關云怪石似人當路立奔泉底事出山忙立  
春日作云客邸春隨新歲至故園花傍戰場開諸聯皆琢句清  
新彈丸脫手矢音集則張燕公所謂白雲起而帝歌翠華飛而  
臣賦者可云湛露蓼蕭之繼不獨賞花釣魚之游如恭和  
御製喜雪用蘇軾題北臺壁二首元韻云縞帶銀杯亦太纖  
宸章格律最精嚴清詞始信如隼玉小語真堪笑撒鹽

鵲鵲光生明

簇仗

蓬萊凍合念窮檐

九天欲和陽春曲深愧蕚芽斂指尖

溫樹陽迴不凍鴉漸看羲馭緩停車醴膏隴上經三白喜氣軍  
中鏖六花禁體詩應賡往制時晴帖許睹

天家

幾餘倘寫漁蓑句會展新圖上畫叉

陸眉生給諫

桐鄉陸眉生給諫

秉樞

咸豐庚申辛酉閒居諫垣上封事最有

聲同治初元用薦以監司需次中州未幾下世中外借之著述  
未行世猶子吉仙茂才號絲槁軒主從給諫子耕瑤刺史

錄詩六首刻入戊寅二月四日申報威鳳一羽可知其全惜奏  
議一卷未錄寄也詠竹云誰翦瀟湘一角煙靈妃環佩故嫋然  
舞龍最有清吟意未要人參玉版禪剔盡銀缸夜漸分碧紗如



霧夢如雲芭蕉不管秋消息收拾閒愁付此君吳門鐙下作家  
書畢偶成六絕題團扇寄內錄二云孤舟風雨自衝寒聽漏荒  
雞翠被單不是郎心愛離別長安花要少年看扇光如月月如  
盤白舫紅閨各自看手寫齊紈親寄與與卿長似月團圓代內  
留別諸姊妹云才得相逢又別離可憐世事竟如棋慚無國手  
來收拾幸有天心妙主持所喜畫眉皆快婿但看衣錦卽歸期  
臨歧各有千行淚應爲新詩一解頤題馮文介公墨梅云熱血  
灑無地酒杯知此心良朋竟千古遺墨忍重尋夢覺孤山遠魂  
歸楚水深寒花吾羨汝未受雪霜侵給諫爲汪勤果軍門聳軍  
門武人而相攸有識長適吳和甫少宰三適黃孝侯少司空給  
諫其蜂鬚畫眉皆快婿非自譽也長安好事者傳誦以比劉位  
坦三位令坦云

巢雲詩稿

俞警菴

臨別號雷門識字農

山陰人喜吟詠工篆刻予見其代玉中丞

德

恭進

萬壽序章四十石蒼勁有法詩則僅見巢雲詩稿一卷嘉慶庚午所作尙有巢雲詩艾二卷此蓋六十歲之詩凡古今體八十七篇如陳二翼天自濟南歸過訪云歷下亭西別風懷又十年突來疑是夢喜到語如顛言念明湖水歸耕負郭田牢騷攄不盡形影暗相憐一把臂同青眼相看互白頭泥塗雙屐天一地一浮鷗方信窮難送誰云富可求千霄雖有志若箇得封侯二從此枌榆社優游杖履中半帆梅墅月十里柳橋風不作梁園客將爲田舍翁莫嫌三徑僻初與五雲通三想到經年別還應逐日過搖脣憐舌在散髮笑頭陀世路滔滔是吾徒咄咄何

鷓鴣常起子行不得哥哥四越中田家竹枝詞云春雪更番兆

有年上元鐙罷力於佃梭船搖向晴湖去原本得湖泥上大

田一舍南舍北漲桃花菜粥生香味頗佳明日清明開禁火新

煙綠處聽鳴蛙俗有清明蛙鳴用一寸秧針一翦齊水田漠漠

鷺于飛麥秋幸值連年好難得春花贖典衣俗呼菜麥立秋最

忌阿香車二九風潮驗不差早色三秬收割了長腰烏觜徧開

花八東隸西莊百穀登稻篷露積賽邱陵杭爲飯米秬爲釀田

作剛完酒作興十勞勞辭五律八十韻則自紀出處游歷詩長

未錄

### 畢剛毅

畢剛毅金科陣亡於景德鎮曾文正公深惜之特撰碑記立於

死毅之所於耆恪慎忌嫉言之詳盡但諱其名銘語尤絕痛讀

之有餘憤焉歸善黃韶九太守

振成

軍中草有丁巳正月五日

書事五律小序云先得書謂初二日出師進攻請撥防石鎮街

是日天星五行皆不利行軍因飛檄改期而兵已發我軍初五

到防隨聞惡耗賊分道來犯以有備遂遁末云軍中新婦在兵

氣信難揚小注纔娶七日按剛毅死僅二十有八袁翼哀詩

自注亦云新婚未久婚七日而致命則如劉忠壯

松山

之乞假

迎親入關授命文正必見之碑中且其新夫人縈弱可憐如褚

汝航林源恩諸公家文正亦必有以厚卹之而全集無隻字及

何耶黃爲陳竹伯中丞丙午所得士癸丑四月入甯藩徐州糧

臺九月隨移蘇藩十二月校靖江馮景干縣試文甲寅春陳撫

江右重九黃亦入幕臘日出辦南康營務乙卯三月廿八偕吳

都司錫光

復饒州丙辰六月廿九矢之偕剛毅及林都司

保於

廿三日再復其城十一月廿四日自鄱陽移營餘干駐桐口灘  
剛毅之請撥防蓋將侍爲聲援而不虞黃之拘術數而遷延不  
進而剛毅先一日以孤軍戰死矣已未臘月恪愼移撫廣東奏  
調黃隨營後官九江同知律以陳家谷口之役恪愼其潘美黃  
不免爲王侁矣

趙耦邨詩

壽蔭廬隨筆云孫淡霞女史哭夫詩豈是玉樓需作記人間不  
及鬼憐才卽雪舫哭子詩縱有命存胡太酷若論天忌本無才  
兩押才字均苦語生新趙耦邨上舍福雲有病依身久似憐才  
之句亦極沈痛庸按靈芬館詩話載查春園又新答南廬云山  
向人青如愛客病依身久似憐才豈上舍與之聞台抑前人名  
句口誦已久信手取用忘而不覺耶隨筆又云程夢錫侍郎江

蘇試牘中孫文揚金陵懷古云百萬金錢誰贖帝一家韜略但  
能文解事麗華空置膝求官叔寶本無心金森姑蘇竹枝云如  
何軟玉溫香土尙有梁鴻對孟光王漪江都竹枝云愁煞玉鉤  
斜畔草年年青到阿麼墳按如何二句全本忠雅堂集則直盜  
襲前人不得援白鷺黃鸝爲王右丞解也

沈芸閣方伯集唐

歸安沈芸閣方伯

銘經

題陳晝卿觀察室綠雲山房詩草集唐

四律云腸斷千休與萬休

韋莊

祇因惆悵對銀鉤

李冶

鴛鴦有伴誰

能羨

女蟋蟀

何知人自愁

戎昱

聚散有期雲北去

許渾

浮沈無計水

東流

魚元

畫堂昨夜西風過

馮延巳

桐樹心孤易感秋

曹鄴

總向紅

箋寫自隨

薛濤

祇因幽恨在新詩

步非煙

謝家詠絮徒相比

姚合

潘岳

悼亡猶費詞

元稹

比目鴛鴦眞可羨

盧照鄰

冷猿秋雁不勝悲

嚴武

長

嗟人與絃俱絕劉禹錫恐是仙家好別離李商隱玉枕長拋未續絃

劉禹錫多情信有短姻緣鮑家落花不語空辭樹白居易明月無情

卻上天薛逢永晝迢迢無一事韋莊春愁黯黯獨成眠韋應物沙窗祇

有鐙相伴裴舊事思量在眼前白居易等閒裁破錦鴛鴦施肩知

道浮雲不久長王蘊秀疑是落花還碧洞趙忍看新草徧橫塘獨

及勸疏杯酒知妨事羅聞把荆簪益自傷李商隱天上人間不相

見崔顯欲將身贖返魂香實以作題詞似沙空泛以之悼亡則尋

常閒淡語傷心飲恨人讀之愁腸欲斷矣

盲詞入詩

盲詞入詩騷壇削色近日詩翁大半奉盲詞爲鼻祖沈蕢漁諧  
鐸殆有所指瀟雪曰彈詞七字句其源亦出於詩不觀玉谿生  
七月二十八日夜與王鄭二秀才聽雨後夢作乎詩云初夢龍

宮寶燄然瑞霞明麗滿晴天旋成醉倚蓬萊樹有箇仙人拍我  
肩少頃遠聞吹細管聞聲不見暗飛煙逡巡又過瀟湘雨雨打  
湘靈五十絃瞥見馮夷殊悵望蛟綃休賣海爲田亦逢毛女無  
繆極龍伯擎將華嶽蓮恍惚無倪明又暗低迷不已斷還連覺  
來正是平階雨未背寒燈枕手眠馮孟亭曰詩係古體古體原  
有似律者觀初唐人集便曉錢龍惕曰此係律詩唐人律詩不  
對者頗多予謂馮說是而錢非此詩倘播之管絃豈非絕好彈  
詞乎茗盃曰卿說信然義山詩後人擗搯不少何以無學此體  
者豈以其體近盲詞而不屑爲之乎予曰祝芷塘悅親樓詩集  
卷二紀夢仿義山體寄甯圃云初夢扁舟到海壖青林紅樹兩  
十六新鮮旋登華屋開珠箔菊秀千枝彩豔攢瞥見庭階羅翠蓋亭  
亭正擢素心蘭洞房曲室隨周步賓從無人並我肩忽仰瓊樓



天半聳君升我止絕攀援漢書數帙陳綈几古本欣然信手翻  
何處鐘聲來下界碧桃紅滿綠窗前恍惚疑逢終是別迷離欲  
往又仍還覺來斜月橫窗角獨聽瑤琴鼠觸絃祝詩仿李轉折  
皆襲用其字倘不先讀義山集或祝詩但云紀夢而無仿義山  
體四字讀者有不如杜曲拾遺廟中之大姨詫爲出於何典安  
得七姨爲之解圍哉瀟雪茗盃皆失笑

蜚蠊卽臭蟲

王霖

弇山詩鈔

卷五

有臭蟲詩三十二韻小敘臭蟲蚤蝨類也而

名不雅馴稗官雜說罕詳其種故詩人略焉大抵生於湫隘卑  
溼之地客居爽塏不聞有是偶與軼髯談及輒衍數語以資撫  
掌詩中有云白晝巧潛藏中宵恣出沒輾轉睡魔驚神魂難帖  
席肩背方失守覺復在肘腋憤懣思生擒腥羶恐污擘驅除甯

云殘逐日命減獲庸按爾雅釋蟲蜚蠊蜚注蜚卽負盤臭蟲疏  
蜚越之所生其爲蟲臭惡南方淫氣之所生也左傳隱元年有  
蜚不爲災杜注蜚負蟊也正義引舍人曰李巡皆曰蜚蠊一名  
蜚廣雅蜚蠊蜚也朱芹爾雅札記蠊以言其色蜚以言其體負  
盤以言其形是蠊經本名蜚一名蠊蜚弇山殆失之不放錢東  
澗壁蝨五古二十九韻借以描寫小人肆毒最爲盡致王云詩  
人略焉亦未核董桂新讀書偶筆卷十舍人李巡以蜚蠊一名  
蜚固非漁仲以蜚爲負蟊亦謬釋蟲別有負蟊

### 仇竹屏

襄江仇竹屏同年炳台晚號蘇竹館選後長假不出予僅於庶常館大  
課時忽忽一晤二十八年來越雲吳樹彼此不得消息今年二  
月九日申報載其七十生辰杜門謝客自訟八律乃知山林清

福同年中微特儀徵中丞愧爲不如卽天上鸞凰下視恐亦羨  
之鄙人亦山中老鶴而綴羽摧翮愁病交侵更無論矣詩云六  
十編詩後忽忽又十年孱軀猶健在故態總依然朱換新成履  
子婦以青留舊擁氈歲暮爲偷兒闖入自攜叩竹杖數年前願香遠太史贈今始用之  
閒步到庭前夢影玉堂過前塵渺若何蹉跎廿八載慚愧十三  
科猿鶴山中老鸞凰天上多茅檐知日暖猶似侍

金坡捧

誥趨庭日

先封公七十壽辰倭文端師賜聯有趨庭捧誥語

中途陟岵悲兼之諸弟謝

奈此貌孤遺清夜終多疚寒門孰起衰松楸一展拜涕淚每交

頤忽抱喪明痛

長子恩福

猶欣一子存漸衰憐老婦後起望諸孫宿

草悲過墓穠華喜爛門

今年十月孫女歸吳氏

寸衷哀樂意聊復一開尊

平生紀游跡豪宕亦偁雄華嶽雲開碧滹沱日落紅揚帆洲島

外放權鏡三屏九中多謝天南交神交載筆工不才長自棄寂

寂此蓬廬偶入吟詩社多慚問字車墨香晨展帖燭影夜修書

聞道院江使曾言我不如同年陳六舟中丞詢近無限斜陽好

其如莫景催琴書僮慣理冠蓋客稀來病葉慚冬柳寒花愛古

梅橫雲生壙就題字在山隈吾鄉數耆碩競說步姚張姚衡堂

兩前輩八十九老鶴迎門懶餓鴻集澤傷頭銜蒙安署夏秋

壽辰均閉門謝客因自號心事古人商五老重相約張君仲英同依壽寓長

紅樓夢戲詠

閩中楊翠巖大令維屏首唱署湘秋侯官何左卿觀察大經署

年尼至侯官楊雪椒光祿慶琛署雲山閩曾少坡刺史元海署

主人和之凡六十篇甲戌正月刻入寶宇瑣記卷一壬午蔡

青閣又刻入紅樓夢廣義後賀縣張鑄庵大令妙香室叢話卷九

節錄二十九篇予謂左卿詠湘雲云觸來犀忿直冒填貧女春  
衫典子錢酒陳羶披鉤弋握詩城誤錮海棠顛重包花枕遙團  
夢半搭香雲鶴露肩清絕吟秋支漏夜一牀如水兩無眠香淺  
云早年掌上惜曹娥不信來因落愛河強繫薦蘿連理少戲拈  
蘭蕙並頭多北風語細飄裙帶夜月詩成逐睡魔且伴小姑居  
處好讓他崔嫂占沙哥雪椒詠李統云大家風範出名門一曲  
離鷺早斷魂花到老梅偏有韻人如仙李總無言看閨牛耳尊  
詩眼夏課熊丸印淚痕畢竟謝庭生玉樹書聲鐙影稻香邨少  
坡詠寶玉云絕頂聰明絕等癡生生死死一情絲因緣幻處傷  
心易粉黛叢中撒手遲冊記已窺無語秘榜花猶折最高枝捲  
單行腳從今去憶否香閨說偈時熙鳳云釵環耀日鬢堆雲滿  
灑風流最出羣慧舌唾成花五色機心深到木三分生來奇癖

獅能吼誤盡聰明象自焚癡絕水精簾下看羨他新婦配參軍  
妙玉云閒雲野鶴本無家偶逐春風下絳槎獨證枯禪緇貝葉  
都將冷癖比梅花清修好伴維摩詰小劫誰憐萼綠華留得蒲  
團還未破有人合掌學趺跏鴛鴦云手把牙牌聽指揮朱虛酒  
令肅重幃點脣紅暈凝脂膩帖鬢青絲落翦稀豈有文鴛甘錯  
嫁羞看野鷺忽驚飛瑤池會上蟠桃熟青鳥翩隨阿母歸平兒  
云酒暈脂痕并淚光簪花親與換新妝嬉春胡蝶原無賴療妒  
倉鷁可有方一樣衾裯多姊妹十分蕉萃剩姬姜匆匆暗載香  
車去半是忠肝半俠腸香淺云前因只合證菩提一入紅塵便  
不齊蓬鬢自甘鴉打鳳羹湯豈料鷺更雞裙腰醺影花前解口  
角吟香夢裏題一語銷卿天壤恨霸王帳下有虞兮晴雲云眼  
角眉梢與舌尖聰明絕等自招嫌蠶媒自占香成國燕子偏教

放出簾病骨添愁扶柳瘦春心絨怨託葱纖芙蓉城本神仙窟  
合爲卿卿一座添襲人云空箱一幅茜紗羅似爲儂家繫薦蘿  
柳絮身輕隨水去桃花命薄奈風何回思春夢縈巫峽曾訂盟  
心指愛河化鶴歸來如問訊紫檀堡上舊人多他如左卿黛玉  
云不須更怨湘江水對面郎心卽九疑可卿云疑團莫解羅衣  
識接引何由到侍兒紫鵲云兒家禁鵲何人近消息虛猜到小  
喬雪根黛玉云淒絕挑鐙焚稿夜畫屏銀燭正吹簫探春云梅  
花合讓爭春色荔子何嘗礙側生紫鵲云思量舊事都酸鼻悵  
觸新愁易上心尙有熱腸憐薄命苦將冷話試知音少坡探春  
云得配齊眉宜貴婿倘令束髮定奇男紫鵲云心眞曾惹癡郎  
病緣淺難招倩女魂賸稿撥灰收半篋殘妝和淚掩重門皆鈎  
心鬥角脫手彈丸尤愛少坡詠寶黛鳳妙寫平香晴襲九首之

耐諷也